

Wël Jethu cï Marko gôt Wët nhom

Wël path kəc col amit puøth, kek ye kəc cï gam piöc rin Jethu cï Marko gôt, aaye jöök wët cï yen ye lueel ëlä, “Wët Puøth Yam rin Jethu raan cï ləc ku dəc, Wën Nhialic.” Jethu aci nyuøth lön ye yen raan ë luui ku ala riël. Riëlde aye tñ piöcde yic, ku riëlden yen jakrəc cuøp wei kəc gup, ku lön yen adumuööm cï looi päl piny. Jethu ë ye jam riænke lön yen ke Manh Nhialic cï bën, ku bï rot gam bï nök, bï kəc poth la pan mac.

Marko aci wël Jethu gôt dhël la cök, cïn yic lueth. Ku aci käk cï Jethu looi teet yiic apath, ku aacie wël cï lueel ku käk cï piöc kek cï gôt kepəc. Yeen aya, aci wël kök cït maany kañ gôt rin Joon raan kəc muøc nhüim, ku lön cï Jethu them ë jøñrac. Ku gët käk cï Jethu looi, cimën piöc ku kë ye yen kəc tuany kony bïk pial. Tëwën cï Jethu kəc piöc, ke kəc cï wëtde gam, aake cï käk ke ye looi ya deet yiic, ku kəc ke man Jethu aaci puøth bën riääk apëi. Wël abëk cï Marko gôt athör yic ciëen, aa kãñ karou cï röt looi tënë Jethu wäär pinynhom nin kadhorou thuønde nhom tueñ, kë cï kəc man ye ye dãm ku piëët tim cï rïiu kou bï thou, ku kë cï yen bën pïr ku jøt rot rañ yic.

Ala kãñ karou, wël Jethu cï Marko gôt thïk kecök, aye tak kəc juëc ciët ye raan dët yen met ke thïn.

Käk tö thïn
Jök cök Wël Puøth Yam 1:1-13
Piöc ë Jethu Galilia 1:14–9:50

Jäl Jethu Galilia bi la Jeruthalem 10:1-52
 Nïn ciëen kadhrou thuunde nhom tuen 11:1–
 15:47
 Jethu aci rot jot thou yic 16:1-8
 Jethu aci rot nyuæth ku jot nhial 16:9-20

*Piöoc Joon raan kæc muæc nhïim
 (Mt 3:1-12; Lk 3:1-18; Jn 1:19-28)*

¹ Wët kënë ë Wët Puæth Yam rin Jethu raan ci læc ku dæc Wën Nhialic.

²⁻⁴ Wäär këc Jethu piöocde guæ jæk Joon raan kæc muæc nhïim ëci piöocde jæk roor tẽ cïi ceñ. Ku wëet kæc ëlä, “Pälkë luæi kæreç, ku calkë röt aa muæc nhïim rin bi adumuömkun päl piny tënë we.”

Ku tuen ëci Ithaya raan kæk Nhialic tiñ gät ku lueel ëlä,

“Tẽ ler yïn, yen abi raan tök kam kæc kækkië luæel cæl alæk kæc, bik yïn tiit.”

Ku ben Nhialic lueel aköl dæt ëlä,

“Raan kækkië tiñ abi kë cit löör gut yic bi yen kæc caal tẽde ë rot, ku læk keek ëlä,

‘Guiærkë dhël ë Bëny, luæikë dhælke bik la cök.’ ”

Tëen, go Joon kæc aa piöoc tẽde ë rot.

Nawën gamkë wëtde ke muæc nhïim, ku ye læk ke ëlä,

“Pälkë luæi adumuömm ku calkë röt aa muæc nhïim, yen abi Nhialic adumuömkun päl piny.”

⁵ Kæc juëc pan Judia ku gen Jeruthalem aaci wet tënë ye, ku lekkë adumuömmken, ku jæl Joon ke muæc nhïim wär Jordan.

⁶ Joon ë ye ceŋ alëth cï looi nhiëm thöräl, ku ceŋ gōöp yen aŋum, ku müith ke ye cam aa koryom ku kiëc. ⁷ Ku ë ye lëk kōc, “Raan bi bën ë nin thiökkä adit ku aril tēnē ya apēi. Yen aciï thōŋ kek ye, nadē ke ya cōk guŋ ba warke dōk. ⁸ Wek aaya muōc nhüim püu, ku yeen abi we muōc nhüim Wëi Nhialic.”

Jethu aci muōc nom ku aci jōŋrac them
(Mt 3:13–4:11; Lk 3:21–22; 4:1–13)

⁹ Ye ninkä yiic ke Jethu bö gen Nadharet tö pan Galilia tēnē Joon, ku muōc Joon nom wär Jordan. ¹⁰ Tēwēn bi Jethu bei wūr, ke tiŋ nhial ke liep rot ku tiŋ Wëi Nhialic ke bö yenhom ke cit kuur ë dit. ¹¹ Ku piŋ röl Nhialic nhial ke lueel, “Yin ë manhdiën nhiaar, yen amit puōu ke yi.”

¹² Kaam awēn ke Wëi Nhialic la yeguōp ku yēth roor tē cï ceŋ. ¹³ Ku jōl Jethu rēer roor tē cï ceŋ nin thiärŋuan kek lääi, ku ë ye jōŋrac them. Ku atuuc nhial aaci bën ku konykē.

Jethu acä amēi kaŋuan cōl
(Mt 4:12–22; Lk 4:14–15; 5:1–11)

¹⁴ Wēn cï Joon dōm, ke Jethu dhuk pan Galilia ku le kōc piōc Wēt Puōth Yam. ¹⁵ Ke ye lueel, “Aköl la cōk aci bën, bääny Nhialic athiök! Pälkē luoi käreç ku gamkē Wēt Puōth Yam.”

¹⁶ Tēwēn kueny Jethu wär Galilia yōu, ke tiŋ amēi karou, Thaimon kek Andria wämēnh ke dōm rec buoi. ¹⁷ Go Jethu lëk ke, “Biathkē ya ku wek aba piōc bāk kōc aa dōm.” ¹⁸ Gokē biaiken nyääŋ piny nyin yic ku buōthkē Jethu.

19 Wën le Jethu tuen tēthin-nyəot, ke tīŋ Jemith wën Dhubedī ku Joon wämēnh ke tō riāi yic ke guir biaiken. 20 Go Jethu ke cəal bik jāl ke ye. Gokē wunden Dhubedī nyään piny riāi yic kek kəc cīk riəp, ku buəthkē Jethu.

Jethu ala riəl yen jəŋrac cuəp wei
(Lk 4:31-37)

21 Gokē la Kapernaum. Nawën aköl cīi kəc Itharel ye luui, ke Jethu la tē ye kəc Itharel kenhūim mat thīn ku piöoc. 22 Go kəc gāi ē piöocde, rin aaci piöoc apath ke la riəl Nhialic, cīi thōŋ kek kəcken piöoc ē lööŋ.

23 Kaam thiin awën, ke raan tō kam kəc tēn amat kəc Itharel, ke la guəp jəŋrac, jam ke cī yeröl jət apei əlä, 24 “Yeŋō wīc tēnē ɣo Jethu raan gen Nadharet? Ca bēn ba ɣo bēn rac? Yīn aŋiɛc, yīn ē raan puəth la cök bö tēnē Nhialic.”

25 Go Jethu jəŋrac duəm thok piny, “Biɛt, ku bäär bei yeguəp!”

26 Go jəŋrac mony awën lath ku wit piny, ku bīi bei yeguəp ke dhiau. 27 Go kəc gāi apei ku thiëckē röt, “Yeŋō kēnē? Ye piöoc yam kek riəl Nhialic. Mony kēnē ala riəl ye yen jak yöök ku gamkē wētde aya!”

28 Kēya, lɛc ku piathde aaci guə thiēi piny pan Galilia əbēn.

Jethu aci kəc tuany kony
(Mt 8:14-17; Lk 4:32-41)

29 Kaam awën jiəl kek tēn amat kəc Itharel, ke Jethu ku Jemith ku Joon la pan yī Thaimon kek Andria. 30 Nawën yeetkē baai ke yök man tīŋ

Thaimon piiny ke cī tōc, ke cī juäi göök. Gokë lëk Jethu. ³¹ Go Jethu la tēnē ye ku dōm cin ku dōc ku kony bī rot jōt. Go juäi guə päl piny, ku bīi miēth tēnē ke.

³² Wēn cī akōl lööny piny, ke kōc guēer tēnē Jethu kek kōc tuany, ku kōc la gup jakrɛc. ³³ Ku jəl kōc juēc geeu kenhīim kut yōt thok. ³⁴ Go Jethu kōc juēc awēn la gup tueny juēc cī bēēi tēnē ye kony bik pial. Ku cop jakrɛc juēc wei kōc gup. Ku cīi jakrɛc päl bik jam rin ŋic kek ye.

Jethu ë kōc Galilia lëk wēt Nhialic

(Lk 4:42-44)

³⁵ Nayōn nhiäk riɛl, akēc piny bak, ke Jethu jōt rot ku jiël baai. Ku le tēde ë rot bī la rōök. ³⁶ Go Thaimon kek kōc kōk Jethu buəoth bik la wīc. ³⁷ Nawēn lek yök, ke luelkë, “Raan ebēn awīc yī.”

³⁸ Go Jethu bēer, “Lokku bēēi kōk tō tuen yīic, ku ba la piöc thīn aya, yen ee kēn bīi yēn.”

³⁹ Ku jəl Jethu pan Galilia kuany yic ke piöc yōnken amat yīic, ku cop jakrɛc wei.

Jethu acä atuet cəl apuəl

(Mt 8:1-4; Lk 5:12-16)

⁴⁰ Tēwēn kueny Jethu bēēi yīic ke piöc, ke raan cī tuet bö tēnē ye, ku gut yenhiəl piny ku lēŋ, “Anjɛc alēu ba ya kony bēny, ba pial. Kony ya.”

⁴¹ Go Jethu ŋääŋ nyinde tīŋ ku wīc bī kony. Ku jōt yecin ku gōt ku lueel, “Awiēc, pialäl!” ⁴² Kaam thiin awēn, ke tuet jiël. ⁴³ Ku jəl Jethu cəl alōc jäl ku thōn apɛi elä, ⁴⁴ “Duk kēnē la lëk raan dēt. Lōr ku nyuəth rot raan kāk Nhialic bī caath, ku juar kāŋ

cit tē ye löŋ Mothith ye luεel thīn, bī kəc ebēn ŋic lən cī yīn pial.”

⁴⁵ Go jāl ku ŋot la kē cī rot looi lək raan ebēn. Ku thiēi wēt piny abī Jethu cīi bēn la geeu ke ŋic. Ku ye rēer tēde ē rot tē cīn yic kəc ē rēer thīn. Go kəc juēc ŋot ke ye bēn tēnē ye baai yic ebēn.

2

Jethu acī raan cī ruai kony

(Mt 9:1-8; Lk 5:17-26)

¹ Nīn juēc cök, ke Jethu ben dhuk Kapernaum. Go guo piŋ lən cī yen dhuk baai. ² Go kəc juēc wēt tēnē ye abī ciēn tē lāäu, ye cök cak la piny yōöt agut yōt thok ayeer. Ku Jethu ē piöoc kəc Wël Puoθh Yam ē Nhialic. ³ Tēwēn ke raan aduany ke ket kəc kaŋuan bīi tēnē Jethu. ⁴ Nawēn cīn tē yēth kek ye tēnē Jethu, rin cī yōt thok thiāŋ kəc, gokē la ku ŋanykē yōt nhom löŋ awēn rēer Jethu thīn. Ku luεeckē raan aduany piny yenhom. ⁵ Tēwēn tiŋ Jethu gamdit tō ke ke, ke lueel tēnē mony aduany, “Manhdiē, adumušōmku aaci päl piny.”

⁶ Go kəc piöoc lööŋ kəc Itharel ke tō thīn, jāl tak ku luelkē kepuōθh, ⁷ “Yeŋö ye mony kēnē jam kēlä. Adhāl Nhialic! Yeŋa adumušōm päl piny? Ciēt ē Nhialic ē rot.”

⁸ Go Jethu kāk yekē tak guo ŋic ku lueel, “Yeŋö ye wek ye tak lən lueel yeŋ lueth? ⁹ Ye kēnēn ril yic ē kākka yiic ba lueel tēnē raan aduany, ‘Adumušōmku aaci päl piny,’ Tēdē ke luεel, ‘Jət rot ku lōm biōŋdu ku cathē?’ ¹⁰ Aba nyuōθh we emēn lən Manh Raan ala riεl pinynhom ba adumušōm

päl piny.” Ku lueel tēnē mony aduany, ¹¹ “Alēk yī, jət rot ku kuany biōᅇdu ku lōor baai.”

¹² Go rot jət ku kuany biōᅇde ke dεei kek ēbēn. Kēnē aci raan ēbēn gōi. Ku leckē Nhialic ku luelkē, “Ÿok aakēc kēcīt kēnē kaᅇ tīᅇ.”

Jethu aci Lebī cōal
(Mt 9:9-13; Lk 5:27-32)

¹³ Nawēn ke Jethu ben dhuk wār Galilia yōu. Go kōc juēc apēi bēn tēnē ye. Gokē piōōc. ¹⁴ Wēn ben yen la tuēᅇ ke dhuk geeu, ke tīᅇ raan ajuēr kut cōl Lebī Alpawuth ke rēēr tēden luōi. Go Jethu lēk ye, “Buōth ya.” Go rot jət ku buōth.

¹⁵ Tēwēn mīth Jethu pan Lebī, kek kōc juēc ajuēr kut, ku kōc kōk la gup anyon, ke kōcken ye buōth ku kōc juēc kōk ye buōth aya, aake mīth kek ye ē tōk.* ¹⁶ Wēn tīᅇ kōc piōōc lōōᅇ, kōc akut Parathī ye, ke mīth kek kōc la gup adumuōōm ku kōc ajuēr kut, gokē kōcken ye buōth thiēēc, “Yeᅇō ye bānydun mīth kek kōc ajuēr kut ku kōc kōk la gup adumuōōm?”

¹⁷ Wēn piᅇ Jethu wēt kēnē, go lēk ke, “Acie kōc puōl kek akiim wic, aa kōc tuany. Ÿen akēc bēn ba kōc path bēn cōal, aa kōc la gup adumuōōm.”

Wēt lōᅇ thēk ē miēth
(Mt 9:14-17; Lk 5:33-39)

¹⁸ Ye nīnkā, kōc Joon raan kōc muōōc nhīim buōth ku jōl aa Parathī, aake la nīn ye kek thek bik cīi mīth. Go kōc kōk bēn tēnē Jethu ku thiēckē, “Ÿok kōc abiōth Parathī ku abiōth Joon yok aa thek, ku yīin ku kacku wek aacie thek, yeᅇō?”

* **2:15** Lebī acōl Matheo aya.

¹⁹ Go Jethu bëër ku lueel, “Yakë wïc bī kəc cī bën ruääi yic rëer ke cii mīth? Acie tēde! Na rëër raan thiëk ke ke, ka cik loi këya. ²⁰ Aköl bī athiëëk däm ku nyεεi keyiic, yen aköl bī kek thek.

²¹ “Acin raan alanh thiin ë yam buööp alanh theer köu, rin alanh thiin yam abī rot rət ku abī aban alanh theer rət bei. ²² Ku acin raan muön abiëc ë yam puök töny theer yic, rin muön abiëc abī töny puöt yic, ku riääk muön abiëc kek töny kedhie. Ku acii bī ya këya, muön abiëc ë yam adhil puök töny yam yic.”

Jethu aci kuec löη aköl löη kəc Itharel

(Mt 12:18; Lk 6:1-5)

²³ Naγon aköl cii kəc Itharel ye luui, ke Jethu kek kocken ye buoöth aake cath ke kuany dhël yic kam ë dum. Go kəc Jethu buoöth rap lek cam dhoη. ²⁴ Go Parathi ke cath ke ke Jethu thiëëc, “Yenö ye kacku luui aköl cī löηdan Itharel pëen bī kəc cii ye luui thin?”

²⁵ Go Jethu bëër, “Këckë kë cī Debit looi wätheer kaη kueen? Wäär nëk cək ye kek kocken ke cath ke ye, ku wickë miëth camkë, ²⁶ go la luanη Nhialic ku ciem ayum ë yath cī tööu tënë Nhialic, kënë aloi rot wäär ye Abiathär raandit kək Nhialic. Ayum kënë ee raan kək Nhialic ë rot yen ë ye cam. Ku yeen aci Debit bën cam, ku gëm abak tënë kocken awën cath kek ye. Këya, acin këεεc cī kackië looi aya.”

²⁷ Ku jöl Jethu lək ke, “Aköl löη aci looi ke ye aköl löη path tënë raan. Akëc looi bī kəc röt aa ban thin. ²⁸ Këya, Manh Raan ë bëny këriëëc ëbën agut aköl ë löη.”

3

Jethu aci mony ci cin ruai kony (Mt 12:9-14; Lk 6:6-11)

¹ Nayon aköl dët, aköl cii kəc Itharel ye luui, ke Jethu la tən amat kəc Itharel, ku mony ci cin ruai ë tō thīn. ² Ku kəc kək aake tō thīn, ku ë wickē bīk tīŋ lən bī Jethu mony kēnē kony bīk la luəm, rin ci yen ye kony aköl cii kəc ye luui. ³ Wēn ŋic Jethu kē tō kepuōth, ke lək mony awēn ci cin ruai, “Jot rot ku bäär tuen tən kəc nhīim.” ⁴ Ku lək Jethu Parathī ëlä, “Wek kəc ŋoot nhīim lööŋ theer yic, ye kēnen yic lēu bī looi aköl cii kəc ye luui, ye kēpath aye kērac, bī raan kony bī pīr, kua pēl wei bī thou?”

Gokē biēt ëbēn. ⁵ Go Jethu ke döt ke ci puōu riäak apēi, rin ŋic kek yic ku cik luel. Ku lək mony awēn ci cin ruai, “Nyoth yicin.” Go yecin nyooth. Go ciεende piath. ⁶ Go Parathī, kəc wic ye bī Jethu nək jäl tən amat ku lek tēnē kəc Ÿerot. Ku lek mat ke ke tē bī kek Jethu nək thīn.

Jethu ee jakrεc cuap wei kəc gup

⁷ Go Jethu jäl kek kacken ye buōath ku lek wär Galilia kōu. Go kəc juēc pan Galilia ke buōath. ⁸ Wēn piŋ kek kajuēc ye Jethu looi, ke kəc juēc apēi bō tēnē ye pan Judia, ku gen Jeruthalem ku Idumie, ku jol aa bēēi tō wär Jordan kōu, ayi gen Tire ku Thidon. ⁹ Go Jethu lək kacken ye buōath bīk riäi guir tēnē ye bī yen la thīn, bīk cii ber piny, ¹⁰ rin Jethu ëci kəc juēc tuany kony. Go kəc juēc kək tuany wic bīk la tēnē ye bīk la gōot. ¹¹ Na tīŋ kəc la gup jakrεc ë ke cuēt röt piny yenhom ku dhiεukē, “Yin ee Manh Nhialic.”

12 Go Jethu jakrɛc yöök bik cii nyooth.

Jethu acä atuuc kathiäär ku rou kuany
(Mt 10:1-4; Lk 6:12-16)

13 Go Jethu kacken wic cöl ku jiël ke ke, ku lek gat nhïim tē cii ceŋ. Wën cī kek yet tēn awën, ¹⁴ ke kuëny raan thiäär ku rou bei kɔc yiic. Ku ciëk ke ke cöl atuuc ku lëk ke, “Wek aca kuany bāk rēer ke ya. Ku wek aba ya tuɔɔc ayeer bāk wētidiē aa la piöc. ¹⁵ Ku wek aabi la riël bāk jakrɛc aa cuɔp wei kɔc gup.”

¹⁶ Kɔc ke cī Jethu kuany bik ya atuöccke aayi, Thaimon (cī Jethu bën cäk ke cöl Piter.) ¹⁷ Jemith Dhubedi kek wämēnh koor cöl Joon (kek aaci Jethu cäk ke cöl Boanergeth, ku wētde yic kɔc ē mär den.)* ¹⁸ Ku Andria, Pilipo, Bartholomeo, Matheo, (cöl Lebi) Thomath, Jemith wën Al-pawuth, Thadawuth, Thaimon, ¹⁹ ku jöl a Judath Ithkariöt, raan wäär cī Jethu bën luəm bi däm.

Jethu aye yöök lön le yen guöp jəŋrac
(Mt 12:22-32; Lk 11:14-23; 12:10)

²⁰ Nawën ke Jethu dhuk Kapernaum. Go kɔc juëc apɛi bën buəth abi ciën tē cök yen nhom lääu kek kacke bik mith. ²¹ Nawën piŋ kɔc ruäai kek Jethu lön ye kɔc rēer kek ye ye lueel, lön cii yen nhom path, gokē la nyaai.

²² Ku eci kɔc kök piöc lööŋ Itharel bö Jeruthalem lueel, “Ala guöp riël Beldhebul. Ee yen bēny jakrɛc, yen ye yiëk riël bi ke aa cuɔp wei.”

²³ Go Jethu ke yöök, ku thööŋ wēt elä, “Ye jəŋrac jəŋ rɛɛc dēt cuɔp wei kädē. ²⁴ Na tek kɔc paan

* **3:17** Ee duër thöŋ kek tušc pušu. **3:22** Mt 9:34; 10:25

tök keyiic ku thërkë kamken, ke pan kënë abī riääk. ²⁵ Na tuum dhiënh tök yenhom aya ku thërkë kamken ë röt, ke dhiënh kënë abī wεεr aya. ²⁶ Këya, na tek jakrεc keyiic ku thërkë kamken, ka thök.

²⁷ “Acin raan lëu ye bī yön raan ril dhon ku nyεei kärke, akon raan ril kënë dom ku der, ku jol käk tö baai nyaai.

²⁸ “Wek aa lëk yic lon nadë adumuööm, ku käreεc yekë ke looi, ku käk yekë lueel, aa lëu bī ke päl piny ëbën tënë kōc. ²⁹ Ku na ye raan Wëi Nhialic yök lon ye yen jonrac, ka adumuöömke aaci kon päl piny akölrïëc ëbën.” ³⁰ Ee lueel Jethu kälä ë rin cī kōc kōk ye lueel, “Ka la guöp jakrεc.”

*Man Jethu ku wämäthakën aaci Jethu nyaai
(Mt 12:46-50; Lk 8:9-21)*

³¹ Go man Jethu kek wämäthakën ë Jethu bën ku këëckë ayeer ku tockë raan bī Jethu la cōl. ³² Go kōc ke rëër, ke cī ye gööm lëk ye, “Moor ku wämäthakui aatō ayeer, ku aa wic yī.”

³³ Go Jethu bëër, “Yeja ë ma ku wämäthakäi? ³⁴ Ku kë wiëc bäk njic, kōc rëër kek ya aa nhiaar, aa cit paan ë ma. ³⁵ Kuat raan wët Nhialic looi yen ë wämääth, ku nyankäi ku ma.”

4

*Kääj dom path ku dom rac
(Mt 13:1-9; Lk 8:4-8)*

¹ Go Jethu bën piöoc wär Galilia yōu. Nawën le kōc juëc apeī gööm, ke la riäi yic ë piu thook ku nyuuc thin, ku jol kōc ëbën nyuc piiny ë piu thook

aʒeer. ² Ku ʒəl Jethu kəŋ aa lueel bī yen kəc piššoc kəjuēc, ku lək ke.

³ “Piεŋkē! Raan puər ēcī la dom bī la pur. ⁴ Ke wən yen rap wεεr dom yic, ke kəth abək lööny dhəl yic. Go diεt bən ku tetkē ke. ⁵ Ku lööny kəth kək alεl nhom tε koor tiəp thīn. Gokē guə cil. ⁶ Nawən la akəl ruεl apei ke rap awən go yom, ku riεεukē rin kēc mεiken yet piny apath. ⁷ Ku lööny kəth abək tε ye tiim la kuəəth cil thīn, na la tiim juək ke dec rap ku cik lok apath. ⁸ Ku lööny kəth kək tiəm path yic, ku ciilkē apath ku dūitkē ku lokkē apath. Rap abək aake cī luək ke thoi nhūim, ku kək ke thööŋ röt, ku rap kək ke dīt nhūim.”

⁹ Ku wit Jethu ləŋde əlä, “Piεŋkē tε le wek yīth.”

Wēt thəəth ə kääŋ

(Mt 13:10-17; Lk 8:9-10)

¹⁰ Nawən cī kəc juēc ʒäl, go atuššocke kathiäär ku rou, ku kəc ke cī döŋ kek ye, thiēc bī kəŋ teet yiic tənē ke. ¹¹ Go lək ke, “Wek aaci nyuəth kē cī rot moony ə bääny Nhialic yic, ku kəc kək kēc gam aabi kəŋ ŋic tε lək ke kəŋ, ¹² kēya, rin na cək alən ye kəckä daai, ka cīi kəŋ bī tīŋ. Ku na cək alən ye kek wēt piŋ, ka cik bī deet yic. Na ke bī röt waar, ŋuət aa kəŋ tīŋ ku detkē keyiic. Ku ŋuət aaci röt thön Nhialic, ku pəl wēt piny tənē ke.”

Jethu aci kääŋ raan puər teet yic

(Mt 13:18-23; Lk 8:11-15)

¹³ Go Jethu lək ke, “Na kēckē kääŋ kənē deet yic ke wek aaci kəŋ kək bī deet yiic. ¹⁴ Kəth cī com aa cīt wētdiēn ya piššoc tənē we. ¹⁵ Kəc kək aa cīt

köth cī lööny dhël yic, ye diæt ke tet. Të piñ kek wët Nhialic, ke jəŋrac bə ku nyɛɛi wët awën kepuəth ku mërke nhïim wët ë Nhialic. ¹⁶ Kəc kək aya aa cīt köth cī lööny aləl la nhom tiəm koor ye rap guə yom thïn, rin kəc meiken yet piny. Ku kəc kək aacit köth cī com aləl nhom, aa löŋ Nhialic gam nyin yic ke mit puəth. ¹⁷ Ku aacie kepuəth ye dæet, aa wët Nhialic guə wai wei tē looi aliäap rot, ku tē yəŋ ke rin wët Nhialic. ¹⁸ Kəc kək aya aa cīt köth cī lööny tē ye tiim la kuəth cil thïn, keek aa wët Nhialic piñ, ¹⁹ ku kajuəc ke diir, rin pïr pinynhom ë tən, nhiër jieek, ku kəpuəth yekë wïc aa bən thïn, ku rɛckë löŋ Nhialic kepuəth. ²⁰ Ku kəc kək aa cīt köth cī puur tiəm path yic, keek aa löŋ Nhialic piñ ku gamkë apei, ku kajuəc path aaye yök tənë ke, cimën rap cī ɲieɛ luək ke thoi nhïim, ku rap kək ke thöönj kenhïim ku kək ke dit nhïim.”

Kääŋ mermer

(Lk 8:16-18)

²¹ Ku ben ke thiëc, “Le raan cī mermer kaŋ yäth yöt ku kum nyin, nadë ke tēɛu agen təc cök, cie tösöu yöt ciəl yic? ²² Kwat kë cī thiaan, aŋot bï rot nyuəth, ku wët Nhialic aŋot bïk pišöc. ²³ Piɛŋkë, tē le wek yith!”

Kääŋ tē ye kəŋ thöönj thïn

²⁴ Ku ben lək ke ëlä, “Tē ye wek kəc kək luəɔi thïn yen ë tē bï Nhialic we luəɔi thïn aya. Dɛtkë kək yakë ke piñ! ²⁵ Rin raan la kədäŋ abï bən muəc, ku na ye raan cïn kədäŋ, ke këthiin ye tak lən tō yen tənë ye, abï nyaai aya.”

Jethu aci kääj lueel rin wët Nhialic

²⁶ Ku la Jethu tuen ku lueel, “Bääny Nhialic ë duër thönj kek kënë. Monytui ëci köth wëer dom yic. ²⁷ Ee rëer akölaköl ku köth awën cï com aa la tuen ke cil ë röt, ke pïr ku dütkë ku akuc kën ë ke looi këya. ²⁸ Köth ëbën aa cil piiny tiop yic. Käu ë kanj lou ku bëi yiëny tök bei, ku jöl la tuen ke dit agut të bë yen deer ku yeer ku lok. ²⁹ Ku të cï kek luok aaye tem rin cï tën tëmtem bën.”

Kääj käu koor nyin ye tiemde dit apeï
(Mt 13:31-32, 34; Lk 13:18-19)

³⁰ Ku ben lueel, “Yenö buk thönj bääny Nhialic? Ye kääj piath nõ buk thönj ye? ³¹ Bääny ë Nhialic acit käu koor nyin cï raan com duemde. ³² Ku na le dit ka la nhial ke loi kër ku yith dit apeï, abi diet yötken aa yik thïn.”

³³ Jethu aci Wët Puoth Yam piöoc tënë koc ë kënj cit kënkä. Aake cï lëk käjuëc lëukë bik ke deet yiic. ³⁴ Ee ye koc jääm ë kënj të piöoc yen koc, ku na ye yeen ë rot kek kacken ye buoath, ka ye tët këriëc ëbën yiic.

Jethu aci yom cäl akääc
(Mt 8:23-27; Lk 8:22-25)

³⁵ Na aköl dät yonthëei, ke lëk Jethu atuöocke, “Lok teemku wär alontui.” ³⁶ Gokë koc kök nyään piny, ku lek riän awën rëer Jethu thïn yic, ku tëmkkë agut Jethu. Ku riëth kök ke tã thïn aaci tem aya. ³⁷ Kaam thiin awën ke yomdit apeï jot rot, ku jot atiaktiak rot abi riäi duër thiän ë piu. ³⁸ Tëwën looi kënë rot, Jethu ë nin riäi yic ciëen, ke cï yenhom

kan. Gokë puöcc ku luelkë, “Bänyda! ʏok aa muou, cii diεεr ë ʏo?”

³⁹ Go Jethu rot jət ku rël yom, “Lə dël!” Ku rël atiaktiak, “Kääc!” Go yom köcc ku le dël. ⁴⁰ Ku thiëc ke, “Yeñö riöcc wek ciët we bï mou? Cäk ñic lən bï ʏen we kony?”

⁴¹ Gokë nhïim la cöt riöldit cit kënë ku jiemkë kamken, “Ye raan yïndë kënë? Na cök a yom ku atiaktiak ë ke piñ wëtde!”

5

Jethu acï raan la guöp jakrεc kony

(Mt 8:28-34; Lk 8:26-39)

¹ Gokë wär Galilia teem ku lek tē cəl Jeratha. ² Kaam wën kεεc Jethu piny riäi yic, ke tiñ mony la guöp jakrεc, ke bö bei rēñ nhïim. ³ Mony kënë ë ye rëer rēñ nhïim, ku acïn raan ye lëu bï rëäk. ⁴ Ee ye rëäk cök ku cin arak juëc, ku ñot ke tueny, ku dhon luñ köth yecök. Ee ril apɛi, acïn raan ye lëu bï rëäk. ⁵ Aköl ku wëer thok ëbën, ee ye cool ku ruu kat rēñ nhïim, ke looi duocot ku ye rot dεeny aleel bï rot nök.

⁶ Wën tiñ yen Jethu tēmec, ke lor ku cuet rot piny yenhom, ⁷⁻⁸ ku lueel Jethu, “Jəñrac, bäär bei ë mony kënë guöp.” Go kiεu looi apɛi, “Jethu Wën Madhəl, yeñö wic ba looi tënë ʏa? Yin aləñ ë rin Nhialic duk ʏa tēm awuöc.”

⁹ Go Jethu jäl thiëc, “Cəl yï ña?” Go bëer, “ʏen aa kut rin ʏok ajuëc.” ¹⁰ Ku jəl mony kënë Jethu ʏa ləñ bï jakrεc cii cop wei tēden rëer kek thïn.

¹¹ Ku duut dïr baai ë nyuäth gət cök ë tēn awën. ¹² Go jakrεc Jethu ləñ, “Tuococ ʏo ë dïrkä gup, ku cəl ʏo aa lur keyiic.” ¹³ Goke puöl, ku jəl jakrεc bën

bei mony awën guöp ku lek dir gup. Go duut diëer, kecit tiim karou rinj agör yic, ku thootkë wïir ku moukë ebën.

¹⁴ Go röör ke biöök dir kat, ku lek kë cï rot looi lueel tënë kəc rëer geeu, ku kəc tō bēxi yiic. Go kəc ebën jal wēt bīk kë cï rot looi la tīj. ¹⁵ Nawën lek yet tënë Jethu, ke yök mony wäär la guöp jakrəc ke rëer, ke cej alath, ke la nhom cök. Gokë riöc. ¹⁶ Go kəc ke cï kën cï rot looi tënë mony awën ku dir tīj, la lək kəc kək. ¹⁷ Ku wën piñ kəc baai ë wēt kënë ë ke riöc, ku lek tënë Jethu ku länjë bī jal panden.

¹⁸ Tëwën le Jethu riäi yic, go mony wën cï Jethu jəŋrac cəl ajiël yeguöp bën tënë Jethu, ku ləŋ bī cath kek ye.

¹⁹ Go Jethu jai, ku lək ye, “Lɔɔr baai tënë kacku ku lək ke kəjuəc cï Bëny looi tënë yī, ku tēpuəth cï luäi yī.”

²⁰ Go jal ku le panden Dekapolith la yic γεu thiäär. Ku kueny keyiic ebën ke ye kəc lək kək cï Jethu looi tënë ye. Go kəc gäi.

*Jethu aci tik kony ku cəl nya aben pīr
(Mt 9:18-26; Lk 8:40-56)*

²¹ Wën cï Jethu bən tem riäi bī dhuk Kapernaum, ke kəc juəc apēi bö tënë ye wär yəu. ²² Kaam wën ke raan cəl Jariöth, bēny tən amat kəc Itharel bö aya. Nawën tīj Jethu, ke cuet rot piny yecök. ²³ Ku ləŋ, “Nyandiën thin koor aci dhal apēi, athou. Bäär ba yicin la tääu yenhom bī pial.”

²⁴ Go Jethu gam ku lööny dhöl kek ye. Ku buəth kəc juəc ke, ke cīk kum apēi.

²⁵ Ku tīj tuany, cī thəkde kəu ye tεem ruöön thiäär ku rou, ee tō kəc yiic, ²⁶ ku yeen ecī wēəu juəc

gäm akim rin bi tuaanyde nuëen, ku tuaanyde akëc nuëen, eci rot jal juak. ²⁷ Ku yeen eci käk ye Jethu looi piñ. Go ben Jethu kōu ku gōot alanhde, ²⁸ rin eci jam ë rot yepušu ëlä, “Na gaat alanhde, ke yen abi pial.”

²⁹ Kaam thiin awen ke riem cii ben kuër, ku yök rot ke ci pial. ³⁰ Go Jethu yök lon cii riël jäl yeguöp. Go yenhom wel ku thiëc kōc, “Yenja cä alanhdie gōot?”

³¹ Go kōcken ye buōoth lëk ye, “Yin ë kōc juëc tiñ ke ci yi kum ku ye thiëc, Yenja cä gōot?”

³² Go Jethu ñot döt kōc bi tiñ yenja ci ye looi. ³³ Wën ñic tiñ awen tuany ye ke tuaany ci jäl yeguöp, go ben tēnë Jethu ke ci riōc, ke leth, ku gut yenhiaal piny Jethu nhom. Ku lëk ye lon ë yen ci ye gōot. ³⁴ Go Jethu lueel tēnë ye, “Nyaandie, gamdu aci kony ba pial, lōr, kek dōr.”

³⁵ Kaam wën jiem Jethu, ke kōc riñ pan Jariōth ku lëkkë ye, “Nyaandu aci yet wei, duk raan piōoc ben rääm nhom.”

³⁶ Ku Jethu ë këc kë cik lueel kuëc nhom, ku lëk ye, “Duk riōc, dæet yipušu ku gam wët yic.” ³⁷ Ku ë cin kōc juëc cii puöl bik cath kek ye, ee Piter ku Jemith ku Joon kepëc. ³⁸ Tëwën yeet kek pan Jariōth ke Jethu yök kōc ke näk röt, ke dhiau apëi. ³⁹ Ku ler yöt ku lëk ke, “Yenjö nek wek rot? Ye dhiëndiit ño kënë? Meth akëc thou, anin.”

⁴⁰ Gokë däl guöp. Go Jethu ke cöl ala ayeer, ku cöl wun meth kek man meth ku kōcken awen kadiäk, ku lek yöt tëwën ci meth täac thïn. ⁴¹ Ku däm cin ku lëk ye, “Nyan thiin, alëk yi, jät rot!”

⁴² Go rot jät nyin yic ku cieth. Go kōc awen tō yōöt kek Jethu gai apëi wën tiñ kek kë ci rot looi (ë ye

run thiäär ku rou.) ⁴³ Ku thøn Jethu ke bik cii læk kəc kək. Ku læk ke bik yiək mieth.

6

Kəc Nadharet aa kəc Jethu gam

(Mt 13:53-58; Lk 4:16-30)

¹ Go Jethu jäl tēden awēn ku ler genden Nadharet, ku buəth kəcken ye buəth. ² Nawēn aköl ē lōŋ, ke piöc tēn amat. Ku kəc juēc aake tō thīn. Nawēn piŋkē piöcde ke gēi, ku luelkē, “Cī kəŋ bēn aa ŋic nēn?” “Ku ye kəkək looi kədē? ³ Yen ē raan guēŋguēŋ tiim, ku ē wēn Maria, ku ē mēnh ē Jemith, ku Jothep, ku Jut ku Thaimon. Ku cie nyiērakēn kə rēēr ē tēn kek ɣo?” Ku jəlkē jai bik piöcde cii gam.

⁴ Go Jethu læk ke, “Raan cī Nhialic lööny yeguöp aye baai ēbēn theek, ka kəc genden ku kəc ruääi kek ye, ku paan wun kek paan man kek aacii ye ye theek.”

⁵⁻⁶ Ku akēc lēu bī kək jāŋ gōi looi, ka kəc tuany lik kek aaci yen yecin tāau kenhiiim, ku kony ke bik pial. Ee cī gāi apei rin kēc kek ye gam.

Jethu acä atuöccke kathiäär ku rou tooc

(Mt 10:5-15; Lk 9:1-6)

Go Jethu jäl ku ler bēēi kək yiic ku le kəc piöc thīn. ⁷ Ku tuum atuöccke ku tooc ke wei, bī kəc karou aa cath ē tək bik aala piöc Wēt Puəth Yam ē Nhialic, ku yīk ke riəl bik kek kəc aala kony. ⁸ Ku læk ke apei. “Duökkē muk ē miith yakē cam dhəl yic, muökkē ke wei kepēc. ⁹ Cēŋkē war ku duökkē muk alēth kək.” ¹⁰ Ku læk ke aya, “Yakē rēēr pan ye we lor thīn yet tē bī wek jäl. ¹¹ Ku na lak pan cii we

lor thïn, ku pan cïi wêlkun ye piŋ thïn, ke we jiël ku tɛŋkê wecök. Ku abï nyooth lɔn cï wek kuc e ke!”

¹² Ku jiëlkê ku lek kɔc piöc bik luoi adumuööm pušl. ¹³ Ku copkê jakrɛc juëc wei, ku tɔckê kɔc juëc tuany nhïim. Ku röökkê bï ke kony bik pial.

*Nääk ë Joon raan kɔc muöc nhïim
(Mt 14:1-12; Lk 9:7-9)*

¹⁴ Ku bɛny Antipäth Yërot ëcï wët piŋ rin cï ke Jethu ŋic apɛi. Ku ë ye kɔc kök lueel, “Joon raan kɔc muöc nhïim acï bɛn pïr, ee yen ale yen riɛl yen kãkkã looi.”

¹⁵ Ku lueel kɔc kök, “Mony kënë adhil a Elija raan wäär kãk Nhialic tiŋ.” Ku ben kɔc kök lueel, “Ee raan tøk kam kɔc thɛɛr, kɔc kãk Nhialic tiŋ.”

¹⁶ Ku wën piŋ Antipäth Yërot ë wët kënë go lueel, “Ee Joon raan kɔc muöc nhïim wäär ca cɔl atök yeth yen acï jɔt thou yic.” ¹⁷ Antipäth Yërot ëcï Joon cɔl anak këlã, ee cï cɔl adɔm ku rek, ku cɔl amac rin wët Yërodia tiŋ Pilipo wãmënh cï rum bï ya tiɛŋde, ¹⁸ rin cï Joon ye lueel tënë ye ëlä, “Acïi path ba tiŋ wãmuuth rum ke pïr.”

¹⁹ Ku Yërodia ëcïi pušu mit tënë Joon rin ë wët kënë. Ku wïc diët nêk ku cïi lëu, ²⁰ rin Yërot ë riöc Joon, rin ye Joon raan puoth wët Nhialic, ku kony bï ciën kē nãk ye. Nawën piŋ Yërot wët Joon, ke gëi apɛi ku ŋot nhiɛɛr bï wël Joon aa piŋ.

²¹ Nawën ke Yërodia jɔl tē bï yen Joon nãk thïn yök, ku ë ye aköl looi Antipäth Yërot yan akölden dhiëeth ye, tënë kocken dīt mɛc kek baai, ku bány apuruuk ku jɔl aa kɔcdīt pan Galilia. ²² Ku nyan

Yërodia nhom guöþ, ee cï bën yæi bi bën dier. Go Yërot kek jåälke puöth miæt apeï tënë ye. Go Antipåth Yërot bëny læk ë nyan ëlä, “Na le ke wïc, ke luel tënë ya ku ba gäm yï.” ²³ Ku kuëen tënë ye jööl nhïim ku lueel, “Kuat këdun ba thiëc tënë ya aba dhiel yiëk yï, cök aløn ë yen aban ë bäanydië.”

²⁴ Go nya la ayeer ku læk man, “Yeñö ba thiëc?” Go man lueel, “Læk ye bi Joon raan kəc muöc nhïim tök yeth, ku gëm yï nhiamde ba bëïi.”

²⁵ Go nya dhuk tënë bëny nyin yic ku lueel, “Yin awiëc ba gäm nhom Joon raan kəc muöc nhïim tën ëmën thiin, ke cï tääu aduök yic!”

²⁶ Kënë acï bëny rac puöu apeï, ku akëc kued rin cï yen mël kuëen ë jööl nhïim. ²⁷ Go bëny apuruökde tooc nyin yic, ku læk ye bi nhom Joon raan kəc muöc nhïim bëïi. Go apuruk la tëwën mec yen thïn ku tök yeth. ²⁸ Ku bëi nhom ke cï tääu aduök yic, ku yik nya, ku jal nya gäm man. ²⁹ Nawën piñ kəc Joon buöth løn cï ye nöc, gokë la ku nyëikë guäpde ku thiäkkë.

*Jethu acï miëth koor juak bi kəc juëc cam
(Mt 14:13-21; Lk 9:10-17; Jn 6:1-14)*

³⁰ Kəc Jethu buöth aake ye bën yenhom ku lëkkë kæk cik looi, ku kæk cik piöc ëbën. ³¹ Kəc juëc apeï aake ye wääc, kəc jiël ku kəc bö tënë Jethu bi ke bën kony, abi Jethu kek atuöccke cïi lääu bik cak mith. Go læk atuöccke, “Jiëlku buk la tã cïn yic kəc buk la löñ.” ³² Gokë jal ë riäi ë röt bik la tã cïi ceñ, ku aake këc kəc læk tã ler kek thïn.

³³ Go kəc juëc ke tñ, ku ñickë ke. Gokë miööt gæeth yiic ku riñkë tuen ke kuany wär köu, ke la tëwën cï Jethu kek atuöccke kenhïim wel thïn. Ku ye

kek kəŋ yet təwən. ³⁴ Wən kεεc Jethu piny riäi yic, ke tɪŋ kəc juëckä. Go wïc bï ke kony rin aci tɪŋ kecit amël pap cïn nhïim abiöök. Ku jəlke piöc kajuëc. ³⁵ Nawën col piny, ke kacken ye buəth bö tənë ye ku luelkë, “Piny aci cuəl ku tən ë ror cïn kë kuany thïn, ³⁶ cəl kəc aa jiël bik la bëëi yiic bik la γəc miëth camkë.”

³⁷ Go bëër, “Miackë ke ë miëth.” Gokë lək ye, “Wïc buk ayuöp lëu ë kəc kithkä γəc tənë ke bik ke cam? Aa wïc wëëu juëc apëi.”

³⁸ Go Jethu ke thiëc, “Ye ayuöp kadë tō thïn? Lak bāk ke la tɪŋ.” Gokë dhuk ku lëkkë ye, “Aa yuöp kadhiëc ku rec karou.”

³⁹ Go lək ke bik kəc cəl anyuc piiny akuut noon təc nom. ⁴⁰ Gokë nyuc piiny akuut buət ku akuut thiärdhiëc. ⁴¹ Go ayuöp awën kadhiëc ku rec karou lööm, ku döt nhial ku leec Nhialic. Ku bəny ayuöp yiic ku gëm ke kacken ye buəth bik ke tek agut rec, tənë kəc. ⁴² Ku mïthkë abï miëth ke göök. ⁴³ Ku jəl kacken ye buəth awuthueei ayuöp ku rec cï döŋ piny kuany gäac kathiäär ku rou. ⁴⁴ Kəc ke cï mïth ëbën, rōr röt aake ye tiim kadhiëc.

Jethu aci cath pïu nhïim
(Mt 14:22-33; Jn 6:15-21)

⁴⁵ Kaam thin awën, ke Jethu yöök kacken ye buəth bik la riäi yic, ku lek tuenjenhom agör aləŋtui gen cəl Bethaida. Ku cəl thëi ajiël. ⁴⁶ Wən cï yen kəc tōŋ, ke jiël bï la gət nom bï la rōök. ⁴⁷ Nawën la thëi bën, ke atuöccke aake ηoot ë riäi yic wär ciel yic, ku yeen ë rot agör nom. ⁴⁸ Goke tɪŋ ke cï gök gër ë riäi rin cï kek kenhïim wël yom.

Nawën bääk ë piny, ke bö tēnē ke ke cath pīu nhīim, ku ë wīc bī ke waan thook. ⁴⁹ Ku wēn tīŋ kek ye ke cath wīir pīu nhīim, ke tīŋkē kecīt atīm raan cī thou, ku dhiεεukē, ⁵⁰ rin ë cik tīŋ kedhie ku riööckē.

Go guo jam tēnē ke ku lueel, “Dεεtkē wepuöth, ee ƣen Jethu, duökkē riöc.” ⁵¹ Ku met rot riäi yic tēnē ke. Go yom kööc. Gokē gäi apεi, ⁵² ë rin këc kek kēnē ayuöŋ wäär cī gām röör tiim kadhiéc deet yic, rin ril kek nhīim.

Jethu aci kəc tuany Jenetharet kony
(Mt 14:34-36)

⁵³ Nawën aköl dēt cī kek wär teem, ke ƣet Jenetharet tö agör nhom ku dämkkē riäi. ⁵⁴ Nawën bīkkē bei ë riäi yic, go Jethu guo ŋic kəc ëbën. ⁵⁵ Gokē kat ku riŋkē bëëi yiic ku lek kəc tuany kēt, ku ƣēthkē ke tē cī kek ye piεŋ thīn. ⁵⁶ Ku kuat tēn cī Jethu la thīn ëbën, bëëi yiic ku gεεth yiic, kəc juéc tuany aake ye täac tēnē ƣöc ku dhöl yiic, ku lanjkē bīk gəot, cək alanhde thok ë path. Ku kuat raan cī ye gəot ëbën, ee ye pial.

7

Jethu aci ciεεŋ kök wärkuan dīt dhöl yiic
(Mt 15:1-9)

¹ Wēn cī Parathī kek kəc piööc lööŋ kəc Itharel, ke cī bën Jeruthalem Jethu gəöm piny. ² Ke tīŋ kəc Jethu buöth ke mīth ke këc kecin löök apath, bīk ajuëc nyaai kegup cīt tē ye kəc Itharel ye luöci thīn.

³ Köckä aake cī kë cī atuuc Jethu looi rac puöth, rin kəc Itharel kek Parathī, aake cīi ye mīth tē këc kek kecin kaŋ löök kecīt ciεεŋ theεr kəcken dīt. ⁴ Ku na le müith cik la bëëi geeu, ka cik cam ke këckē

kaŋ lɔk kɔth. Ku keek aake ye kāk cī kɔcken dīt theɛr lɛk ke looi, cimɛn lɔk biiny ku tɔny ku aduuk ɛ miɛth.

⁵ Go Parathī ku kɔc piöc ɛ lööŋ Jethu thiëc, “Yenö cii kɔckun yi buɔth ye ceŋ ɛ ciɛɛŋ wärkuan dīt, ku yekë miiith juääk ke kɛc kecin lɔk?”

⁶ Go Jethu bɛär, “Ithaya aci yic lueel ɛ rienkun lɔn ye wek awɛŋ puɔth rou, ku gɛt ɛlä, ‘Kɔckä aa ɣa leec kethook ku aliu kepuɔth.

⁷ Keek aa ɣa door ku acie duöör ɛ yic, rin keek aa kɔc piöc lööŋ ciɛɛŋ wärkuan dīt ciɛt ke ye lööŋkié!’

⁸ “Ee yic, wek aacit kɔc ye Ithaya jam ɛ rienken. Wek aaci kuc lööŋ Nhialic ku ye lööŋ ciɛɛŋdun kek yakë gam.”

⁹ Ku lɛk Jethu ke, “Ayakë tak lɔn ɛ yen kɛpath yen cäk looi ye wek kuc lööŋ Nhialic, ku muökkë ciɛɛŋdun theɛr. ¹⁰ Rin aci Mothith lueel, ‘Thek wuur kek moor, ku na ye raan wun kek man jääm gup käreɛc, ka dhil nɔk bi thou.’ ¹¹ Ku ayakë lueel aya lɔn ye yen yic, bi raan wun kek man jäi tɛ wic kek kɛpüür kek tɛnɛ ye, ‘Acin tɛ kuöny we, rin ɣen aci Nhialic gäm kɛn ba yiëk we.’ ¹² Ke wek aa kuc bi kakkä cii loi tɛnɛ wun ku man. ¹³ Këya, tɛ ye wek kɔc piöc thin acii thöŋ kek wɛl ye Nhialic lueel. Ku wek aa käreɛc juëc kɔk cit kakkä looi aya.”

¹⁴ Go Jethu kɔc juëc bɛn cɔl ku lɛk ke, “Piɛŋkë wɛtdië wedhie ku dɛtkë yic. ¹⁵ Acie kë ye raan cam, yen ye cɔl aye raan rac, aa kāk ye tak ku kāk ye lueel, ku kāk ye looi kek aaye cɔl aye raan rac. [¹⁶ Piɛŋkë tɛ le wek yiith.”]

17 Wën cī yen kəc nyääŋ piny aʒeer ku ler ʒöt, ke thiëc kəcken ye buəəth bi wēt awën cī lueel teet yic tənë ke. 18 Go lək ke, “Cäk kəŋ ye deet yiic aya? Acie miëth ye raan cam yen ye cəl ala guəp adumuəəm, 19 rin acie la yepuəu, ee la yeyäc ku le bën bei.” Këya, acī Jethu nyuəəth lən miëth ëbën apath.

20 Ku ben lək ke, “Aa kək ye raan tak ku looi ke, kek aa rɛc. 21 Rin puəu yen aye käreɛc ye looi bën bei thīn, cīmën bal ku ruəəm, ku nääk raan ë path, ku kər diäär. 22 Ku kook ku wëëŋ ku nhiam ku tiɛl, ku yik yepuəu kënë raandä, ku luəəm ku kuat käreɛc ëbën. 23 Käkä ëbën aa bën bei raan puəu, ku looi ke ku rɛckë ye.”

*Tiŋ cī gam lən bi Jethu nyaande kony
(Mt 15:21-28)*

24 Ku ʒəl Jethu ʒäl ku ler wundät tēthiääk kek Tire ku Thidon, ku ler ʒöt. Ku cīi wic bi la raan ŋic ye. Ku akēc lëu bi thiaan. 25 Go tiŋ la nyanden koor ŋot kēc kuäc cī ʒəŋrac la yeguəp, Jethu piŋ. Go bën tənë ye ku gut yenhiaal piny Jethu nhom. 26 Tiŋ kënë ë ye jam thoŋ Giriik, ku ee nyan pan Ponicia. Go bën ku ləŋ Jethu ëlä, “Bëny, cək a lən cī ʒen ye tiŋ pandun ke yi bö ba ʒəŋrac cuəp wei nyaandië guəp.”* 27 Go Jethu lueel, “ʒen ʒa cīi bö ba miëth mīth bën gäm ʒək. Acie yic bi miëthden yiək ʒək, ke kēc kueth.”

28 Go bëër, “Ee yic Bëny, ku ʒək rëër tē mīth kəc thīn awuthueei cī lööny piny kuany.” 29 Go Jethu lək ye, “Rin cī yīn ye ŋiɛc bëër këya, dhuək baai, yīn abī ʒəŋrac yök ke cī ʒäl nyaandu guəp!”

* 7:26 Tiŋ kënë ee cie nyan Itharel.

³⁰ Go dhuk baai ku yök nyaande ke cī tōc biöök yic, ku jəŋrac ke cī jäl yeguöp.

Jethu aci raan miŋ cie jam kony

³¹ Go Jethu jäl Tire ku dhuk wär Galilia ke kuany gεεth kathiäär Dekapolith yiic ku Thidon. ³² Tεwēn ke kōc kōk bīi raan cī miŋ tēnē Jethu, ku länkē bī gōot. ³³ Go Jethu nyaai kōc yiic ku γēth tēde ē rot, ku tēū yecin yeyic, ku ηuut ku gōot liep.

³⁴ Ku dōt nhial ku wēēi apēi ku lēk ye, “Piēŋē!” ³⁵ Kaam thiin awēn, ke γōr yīth ku jιεm. ³⁶ Ku yōök Jethu kōc awēn tō thīn bīk cīi lēk raan dēt. Ku ηot lek lueel. ³⁷ Ku kōc cī ye piŋ aaci gāi apēidit ku luelkē, “Mony cōl Jethu kēnē aci kēriēēc ēbēn lēu. Kōc cī miŋ aa piŋ ēmēn, ku kōc ke cie jam, aaci ya jam aya.”

8

Jethu aci raan tiim kaŋuan cōl akueth

(Mt 15:32-39)

¹ Ye nīnkā, ke kōc juēc mat kenhīim. Nawēn cīn miēth ke Jethu cōl kōcken ye buōath ku lueel, ² “γēn aci guöp ηōŋ, rin kōckā aaci rēer kek γa nīn kadiäk ēmēn, ku acīn kē camkē. ³ Na cal ke aa dhuk bāāiken yiic, ke cīn kē cīk cam, ka la wīik dhēl yic, rin kōc kōk aabō tēmec.”

⁴ Go kōcken ye buōath lēk ye, “Ye tēnen roor ē tēn bī raan miēth yök thīn bī kōc juēckā cam?”

⁵ Go Jethu ke thiēēc, “Lak ayuöp kadē?” Gokē lueel, “Aa dhorou.” ⁶⁻⁷ Go lēk thān awēn bīk nyuc piiny. Ku lōöm ayuöp awēn kadhorou ku rec thii lik ku rōök Nhialic, ku bēny keyiic, ku gēm ke kōcken ye buōath bīk ke tēk kōc. Gokē looi kēya.

8-9 Ku jəl thän awën, kecit tiim kanuan mïth bik kueth. Ku jəl kəc Jethu buoath awuthueei ayuöp cï döŋ kuany gääc kadhorou. Ku jəl Jethu kəc cəl ajiël, 10 ku ler riäi yic kek kacken ye buoath, ku lek pan cəl Dalmanutha.

Jethu acï kuc bi kënë jän göi looi

(Mt 16:1-4)

11 Tëwën ke Parathï kək ben bën tənë Jethu ku teerkë wët kek ye, ku wickë bik deep ë wët, gokë yöök bi kënë jän göi looi, bi nyuöth ke lön ye Nhialic wëlke gam. 12 Go Jethu keŋ apei ku lueel, “Yeŋö ye riëc aköl thiëc kënë jän göi. Wek alëk yic. Acin kecit kënë bi nyuöth ke.” 13 Ku nyiëen ke piny, ku dhuk riäi yic, bi teem wär alontui.

Duökkë ye tak cïmën Parathï ku Antipäth Yërot

(Mt 16:5-12)

14 Kəc Jethu buoath aake cï nhïim mää r bik ayuöp juëc cïi muk wën ler kek riäi yic, ku mukkë ayuö m tök giliŋ. 15 Go Jethu lëk ke, “Tiëerkë nhïim, ku tietkë röt bäk cïi nhiam cïmën Parathï ku Antipäth Yërot, nhiaamden ke cəl ago puör cïmën ayum cï yiëk yic luu.”

16 Gokë jam kamken ëlä, “Ee wët kënë lueel rin cïn yok ayup.”

17 Go Jethu kë luelkë guo ŋic, ku thiëc ke, “Yeŋö ye wek ye tak wek acin ayup. Cäk kän ye tak lön bi yen we muöc ayup. Cäk kän ye tiŋ ku detkë keyiic, kua cäk puöth cör? 18 Wek aala nyin, cäk ye daai? Ku wek aala yith, cäk ye piŋ ku cäk ye tak? 19 Ye gääc awuthueei kadë cäk bën kuany wäär beny yen

ayuöp kathiëc yiic tënë röör tiim kadhiëc?” Gokë bëër, “Ee gäc thiäär ku rou.”

²⁰ “Na wäär beny yen ayuöp kadhorou yiic tënë raan tiim kaḡuan, ye gääc awuthueei ayuöp cī dōḡ piny kadë cäk bën kuany?” Gokë lueel, “Aa dhorou.”

²¹ Go Jethu ke thiëc, “Ku këya ëmën ḡot cäk ye deet lön le yen riel ba miëth gäm we?”

Jethu aci mony cöar pan Bethaida kony

²² Gokë bën Bethaida. Go kōc kōk mony cī cöar thel tënë Jethu, ku läḡkë bī gōot. ²³ Go Jethu cöar dōm cin ku thel wei baai. Nawën cī ḡuōōt nyin, ke tēēu yecin yenyin ku thiëc, “Le kë ye tḡḡ?” ²⁴ Go yenhom jōt ku lueel, “Yen acie daai apath, yen ë kōc tḡḡ kecīt tiim kek cath.”

²⁵ Go Jethu yecin ben tāäu yenyin, go daai ku tḡḡ këriëc ëbën apath. ²⁶ Go Jethu cāl adhuk paande ku thōn bī cīi la lëk kōc kōk.

Pīter aci Jethu ḡic

(Mt 16:13-20; Lk 9:18-21)

²⁷ Go Jethu kek kōcken ye buōōth la Cetharia Pilipi. Tēwën ciëth kek, ke thiëc Jethu, “Lëkkë ḡa, ye jāḡ tak ye yen ë ḡa?” ²⁸ Gokë lueel, “Ayekë lueel lön ye yīn Joon raan kōc muōōc nhīim. Ku lueel kuat dēt lön ye yīn Elija, ku kōc kōk ayekë lueel lön ye yīn raan tōḡ kam kōc kāk Nhialic tḡḡ.”

²⁹ Goke thiëc, “Na week yakë lueel lön ye yen ḡa?” Go Pīter bëër, “Yīn nhom guöp, yīn ë Raan cī lōc ku dōc.” ³⁰ “Kë ca lueel ë yic Pīter.” Ku lëk ke, “Duōkkë lëk raan dēt.”

*Jethu ë jam Arɛɛmde ku Thuɔnde
(Mt 16:21-28; Lk 9:22-27)*

³¹ Nawën ke jəl Jethu piöc ëlä, “Manh Raan abï dhiel reem, ku yeen abï kəcdit baai, ku bāny kāk Nhialic ku jəl aa kəc piöc lööŋ kəc Itharel jai, ku näkkë. Ku yeen abï nīn kadiäk nök piiny ë raŋ yic, ku ben pīr ku jət rot raŋ yic.” ³² Ku teet kënë yic apath tēnë ke. Go Pīter miət wei kəc yiic ku yöök bī cīi ye jam këya. ³³ Go Jethu yenhom wel ku tīŋ kəcken ye buəth ku rēl Pīter ku lueel, “Jäl ɣalööm jəŋrac. Wīc ba kāk cī Nhialic guiir waar yiic! Kāk ye tak aacie kāk Nhialic, aa wēl raan ë path.”

³⁴ Ku jəl Jethu kəcken ye buəth cəal ku lək ke, “Na le raan wīc bā buəth, ka dhil nhom mää r kəpuəth bī yök piërde yic pinynhom ë tēn. Ku dhil puəu riel ku buəth ɣa, cək alən wīc kəc kək ye bīk nök ë riənkië. ³⁵ Rin raan wīc ye bī wēike kony aabī muər, ku na ye raan mār wēike ë riənkië ku rin piöcdië, ka bī wēike muk akölriëc ëbën. ³⁶ Yeŋö bī raan kuany thin, bī jak apei pinynhom ku mēr wēike? ³⁷ Pīr wēi akölriëc apath, acīn kë lēu bī ye waar. ³⁸ Na ye raan guöp yār ɣa ku piöcdië ë riëc cīi ye wīc bī wēt Nhialic gam, ke Manh Raan abï guöp yār ye aya, aköl dhuk yen kek diik Wun kek atuuc Nhialic.”

9

¹ Ku le tueŋ ku lueel, “Wek alək yic, ala kəc kək rēër ë tēn, aacīi bī thou agut tē bī kek ɣa tīŋ kek riel ye nyuəth lən ye ɣen bēny cī Nhialic ləc.”

Jethu aci guäpde rot waan
(Mt 17:1-13; Lk 9:28-36)

² Nawën nin kadätem cök, ke Jethu cöl Pïter ku Jemith ku jöl a Joon, ku lek gøn bär apëi nhom kepëc. Kaam wën rööök kek, ke tïŋ Jethu ke cï rot waan, ³ ku jöl aläthke Ƴer apëi abïk la diardiar. ⁴ Nawën ë ke tïŋ Elija ku Mothith ke jam kek Jethu. ⁵ Wën cï kek rëer kaam thin-nyöot, go Pïter lëk Jethu, “Raan piöoc, apath buk rëer ë tën. Ƴok abï duël kadiäk looi, tök tënë yï, ku tök kek Mothith, ku töŋ dët kek Elija.” ⁶ Kënë jïem yen këlä, ee rin kuc yen wët peth bï lueel, rin këpuoth cik tïŋ cï ke nyön nhïim wël.

⁷ Go këcït rur piny paat abï ciën tē yekë tïŋ, ku piŋkë Nhialic ke jam ëlä, “Kënë ë Wëndiën nhiaar, piŋkë wëtde.” ⁸ Nawën tïŋkë piny kaam thiin awën, ke ye Jethu yen tïŋkë yetök.

⁹ Tëwën dhuk kek piny gät nhom, go Jethu lëk ke, “Duökkë käk cäk tïŋ lëk raan dët Ƴet aköl bï Manh Raan jät ran yic.”

¹⁰ Gokë wët Jethu gam, ku jölkë röt aa thiëec ëlä, “Yeŋö wïc Jethu bï lueel wën ye yen jam jön rot ë ran yic?” ¹¹ Ku thiëckë Jethu, “Yeŋö ye kac piöoc lööŋ ye lueel lön ye yen Elija yen bï kan bën tuen, ku ëmën aci lök bën yicök?”

¹² Go bëer ëlä, “Ee yic, Elija akəŋ bën tuen, rin bï yen dhël bën guir. Ku yeŋö gët ye aya, lön Manh Raan abï kac Itharel jai, ku abïk cöl arem apëi? ¹³ Alëk we lön cï Elija bën thëer ku acik luöoi tēden nhiarkë, cït tē cï ye gät thïn thëer rienke.”

Jethu aci dhöj la guöp jöhrac kony
(Mt 17:14-21; Lk 9:39-43)

¹⁴ Nawën dhukkë tënë abiöth Jethu kök awën, ke yökkë ke ke ci kəc juéc apëi gööm, ku kəc piöoc lööj ke teer wël ke ke. ¹⁵ Tëwën tñj kek Jethu, gokë puöth miët apëi ku lorkë ku muöthkë. ¹⁶ Nawën yëët Jethu tënë atuöccke ke thiëc, “Yenö tærkë wek ke?”

¹⁷ Go raan tök thän awën yic wët dët tëëm thïn ku lueel, “Raan piöoc, yen aci manhdiën ca kanj bëëi tënë köckun yï buöth, ben bëëi tënë yï, rin këc kek jöj tö yeguöp lëu bik cuöp wei. Yeen aci jöhrac la yeguöp ku ye pën jam. ¹⁸ Të döm ë jöj kënë ye, aye wiet piny ku yik thok ayök, ku reem yelec ku riny. Yen aci köckun yï buöth thiëc bik jök cuöp wei, ku akëckë lëu.”

¹⁹ Go Jethu lëk ke, “Wek kəc cie lac gam, yakë tak ba rëer kek we yet nen, bäk jäl gam. Bëëikë dhöj kënë tënë yen.” ²⁰ Gokë bëëi tënë ye.

Kaam wën tñj jöhrac Jethu, ke leth dhök ku wit piny ku löör ku yik thok ayök. ²¹ Go Jethu wun thiëc, “Ye nen döm jöj kënë ye?” Go bëër, “Tëwäär ye yen meth. ²² Aci jöj kënë duër nöc, aye wiet mæc, ku le wiet wïr bi duër mou. Na lëu ke yï kony yö.”

²³ Go Jethu lëk ye, “Yenö ye yïn ye lueel, lön na lëu! Ee yic, këriëc ëbën apuöl yic tënë raan ci gam.”

²⁴ Go wun meth dhiau, “Yen ala gam ku akoor, kony ya bi gamdië rot juak.”

²⁵ Nawën tñj Jethu kəc juéc ke bö tëthiäak kek ye, ke rël jöhrac ku lueel, “Ee yïn jöj miñ cie jam. Yïn ayök, bäär bei dhök guöp, ku duk ben dhuk yeguöp.”

²⁶ Go jəŋrac dhiau yeröl ku wit piny, ku læth, ku bii bei. Ku jəl dhök anaŋnaŋ piiny abī kəc kək aa lueel, ka cī thou. ²⁷ Go Jethu dəm cin ku kony bi rot jət. Go rot jət ku kēēc.

²⁸ Tēwən rēer Jethu kek kəcken ye buəth ē röt, ke thiëckē, “Yeŋö kēc yok ye lēu buk jəŋ kēnē cuəp wei?” ²⁹ Go lək ke, “Jəŋ cīt kēnē acäk lēu bāk cuəp wei. Ee rök ē rot yen ē ye alēu bi jak cīt kākka cuəp wei.”

Jethu acī bən jam ē Thuənde
(Mt 17:22-23; Lk 9:43-45)

³⁰ Go Jethu kek kəcken ye buəth jəl tēwən ke ke ret pan Galilia yic, ku cii wic bi la raan ŋic ye. ³¹ Rin ē nīnkä ē piöoc kəcken ye buəth kē bi rot luäi ye, “Manh Raan abī thön kəc bi ye nək, ku na aköl ye nīn diäk ka bi rot jət raŋ yic.”

³² Ku aa kēc wētde bən deet yic, ku riöockē bik thiëc.

Kəc Jethu buəth aaci wēt tær
(Mt 18:1-5; Lk 9:46-48)

³³ Gokē yet Kapernaum. Nawən lek yet yöt, ke thiëc atuöocke, “Yeŋö kēnē tærkē wən dhël yic?”

³⁴ Gokē gup riöoc ku bitkē, rin wən cieth kek, aake teer wēt lən, yeŋa kamken yen dīt apei. ³⁵ Go nyuc ku cəl atuöocke kathiäär ku rou ku lək ke, “Pieŋkē, na ye raan wic ye bi tšu tueŋ, ka dhil dhuk ciëen ku luui rin kəc ēbən.” ³⁶ Ku dəm meth ku cəl akäac kenhiim ku tēu yecin yekēt ku lək ke, ³⁷ “Raan manh koor cīt manh kēnē lor ē rienkië, acä lor, ku raan ya lor, acie yən ye lor, ee Wä Aciëŋ toc ya.”

9:34 Lk 22:24 **9:35** Mt 20:26-27; 23:11; Mk 10:43-44; Lk 22:26

9:37 Mt 10:40; Lk 10:16; Jn 13:20

³⁸ Nawën aköl dët ke lëk Joon ye, “Raan piöoc, γok aaci mony dët tiŋ keye jakrɛc cuop wei kɔc gup ë rienu ku acuk pëen rin acie raanda.” ³⁹ Go Jethu lueel, “Duškkë ye pëen rin raan kãŋ looi rienukië, acii lëu bi rot guo wel ku lëk γa kërɔc.” ⁴⁰ Rin raan cii γo man, ee raanda. ⁴¹ Wek alëk yic, raan we muooc piü ë rin ye wek kɔc Raan ci lɔc ku dɔc, abä ariöppe yök.”

*Ba raan dët thöoc kërɔc yic
(Mt 18:6-9; Lk 17:1-2)*

⁴² Na ye raan wëŋ mɛnh tök kam ë mithkä ku bä maan, ka ŋuëen tënë ë raan cit kënë, diët ci ruök yeth alal düt tet, ku pik wiir bi mou. [⁴³ tã cii kãmden ë thou thün, ku mac acie thou akölrüëc ëbën.] ⁴⁴ Ku na ye ciëndu yi cɔl aloi awuoc, ke tɛm wei, aŋuëen ba pür pür path kek ciëen tök, kek tã bi yin la cin karou ku cuet yi pan many cie thou akölrüëc ëbën. [⁴⁵ tã cii kãmden ë thou thün, ku mac acie thou akölrüëc ëbën.] ⁴⁶ Ku na ye cöckdu yi γath awuoc yic, ke tɛm wei, rin aŋuëen ba pür pür path ke yi ye ŋɔl, kek tã bi yin la cök karou ku cuet yi pan mac. ⁴⁷ Ku na ye nyiendu yi cɔl aloi awuoc, ke ŋuët bei. Aŋuëen ba rot mat bäany Nhialic yic kek nyien tök, kek tã bi yin la nyin karou ku cuet yi pan mac. ⁴⁸ Ee tãen arɛm yekë yök thün acie thök, ë rin many pan mac acie many ye yor.

⁴⁹ Raan ëbën abi lɔk ë mac cimën ye ajuër lɔk awai.

⁵⁰ Awai apath. Ku na thöök köu alëi ke ben dhuök thin kädë? Rërkë kek awan mäath kamkun ku lakkë döör kamkun.

10

Jethu apiöoc wët liösi
(Mt 19:1-12; Lk 16:8)

¹ Go Jethu jäl tēwēn ku ler Judia ku teem wār Jordan. Go kōc juēc apēi bēn guēr tēnē ye. Goke piöoc cīmēnden thēr.

² Go Parathī kōk bēn tēnē ye ku wickē bīk deep wēt ku thiēckē, “Na pāl raan tiēnde ke cīi path?”

³ Go Jethu bēer, “Yējō cī Mothith lēk we wāthēr?”

⁴ Gokē lueel, “Acī Mothith puöl bī moc athör liösi göt, ku pēl tik.”

⁵ Go Jethu dhuök ke, “Mothith acī löj kēnē gāt we ē rin wārkuān dīt aake cie yith ye lac gam. ⁶ Ku wāār tuēj cēk Nhialic kōc aacī cak moc ku tik. ⁷ ‘Ku rin ē wēt kēnē raan abī wun ku man nyāāj piny, ku le ker kek tiēnde, ⁸ ku keek karou aabī ya many tōk.’ Kēya aacīi ben ya rou aa tōk. ⁹ Kēya, na cī Nhialic ke puöl bī ya moc ku tik, ka cīn raan pāl njek kamken.”

¹⁰ Ku wēn cī kek dhuk baai, ke thiēec kōcken ye buōth ē wēt kēnē. ¹¹ Go lēk ke, “Na ye raan liöi tiēnde ku thiēek tiņ dēt, ka cī kērac looi tēnē tiņden tuēj. ¹² Ku na ye tiņ pāl muonyde ku le mony dēt thiaak, ka cī akōr looi.”

Jethu adōc mīth

9:50 Mt 5:13; Lk 14:34-35 **10:4** L.rou 24:1-4; Mt 5:31 **10:6**
Cäk 1:27; 5:2 **10:8** Cäk 2:24 **10:12** Mt 5:32; 1Kor 7:10-11

¹³ Kɔc kɔk aake ye mīth bēi tēnē Jethu bī ke bēn dɔɔc, go kɔc Jethu buɔɔth ke lääť. ¹⁴ Nawēn la Jethu kē looi atuɔɔcke tiŋ, ke dak puɔu ku lueel tēnē ke, “Calkē mīth aabɔ tēnē ɣa, duɔkkē ke pēn. Raan wīc ye bī la bāāny Nhialic yic adhīl gam cīmēn ē mīth thiikā. ¹⁵ Alēk we, raan wīc ye bī bāāny Nhialic yök adhīl wēt Nhialic gam, cīmēn ye manh koor wēt kɔc ke dhiēth ye gam.” ¹⁶ Ku cɔɔl mīth yelɔɔm ku tēu yecin kenhīm ku dɔɔc ke.

Raan ajak

(Mt 19:16-30; Lk 18:18-30)

¹⁷ Tēwēn jiēl Jethu geeu, ke raan riŋ tēnē ye ku gut yenhiaal piny ku lueel, “Raan piöoc path yeŋö ba looi ba pīr akölrīēc ēbēn yök?”

¹⁸ Go Jethu thiēc, “Yeŋö yīn ye lueel lɔn ɣen apath? Acīn raan path, ee Nhialic ē rot yen apath. ¹⁹ Yīn aŋic lööŋ Nhialic, ‘Duk raan näk, duk tiŋ raan dēt kɔr, duk kuēēŋ wēt lueth, duk cuēer, thek wuur ke moor.’ ”

²⁰ Go bēer, “Raan piöoc, lööŋkā aaya theek tēwäär koor ɣen agut cīt emēn.” ²¹ Go Jethu döt apēi, ku nhiεer ku lueel, “Ee tök yen akēc looi, lɔr ɣaac kākku wei ēbēn ku gam wēu tēnē kɔc ŋöŋ, yīn abī jiεek la yök pan Nhialic, ku bāār buɔɔth ɣa.” ²² Wēn piŋ yen wēt kēnē, ke mēen ku jiēl ke cī puɔu dak, rin ē la kajuēc apēi.

²³ Go Jethu yenhom wēl kɔcken ye buɔɔth ku lēk ke, “Abī yic riēl tēnē ajīεek bīk la bāāny Nhialic yic.”

²⁴ Go kɔcken ye buɔɔth gāi ē wēlkā. Go Jethu bēn ber yic tēnē ke, “Miēthkiē, yeŋö ril yen kēya bī raan

la bääny Nhialic yic! ²⁵ Apuəl yic bi thöröl bak with cök, tənē tē bi raan ajak la bääny Nhialic yic.”

²⁶ Gokē ɲot ke gäi apɛi, ku thiëckē, “Na ye këya, ke yeɲa bi la pan Nhialic?”

²⁷ Go Jethu ke döt ku bëër, “Acii raan bi lëu ë rot, bi gam tē këc Nhialic ye kony, rin Nhialic ë këriëëc ëbën lëu, acin kë dhal ye.”

²⁸ Go Piter rot ɲot ku lueel, “Na ɣo, ɣok kɔc ci kakkua ëbën nyääŋ piny ku buəthku yi?”

²⁹ Go Jethu bëër, “Ee yic, ku alëk we, kua raan ci panden nyääŋ wei kek paan ë man ku nyiërakën, ku wun ku man ku miëthke ku kacke ëbën ë rienkië, ku rin wët Nhialic, ³⁰ cii käjuëc bi yök pan Nhialic. Abi bëëi juëc ku wämäthakën ku nyiërakën ku mäarakën juëc, ku miñh ku dum, ku kuɔc ciëëŋ bi ye kuɔc ciëëŋ aabi yök aya arak buəɔt. Kakkä aabi yök pinynhom ë tən, ku abi pir akölriëëc ëbën yök aköldä. ³¹ Ku kɔc juëc tō tuenɲ emën aabi döŋ ciëën, ku kɔc kək juëc tō ciëën aabi la tuenɲ.”

Jethu ajam ë Thuənde kën yic diäk

(Mt 20:17-19; Lk 18:31-34)

³² Naɣon aköl dët Jethu kek kɔcken ye buəth, ku kɔc kək aake kuany dhël yic, ke la Jeruthalem. Ku Jethu ë tō tuenɲ ku buəth kɔcken ye buəth ke ci nhiiim mum. Ku kɔc awën biöth, ke ci riöc. Go Jethu atuöccke kathiäär ku rou ben caal tēden röt, ku lëk ke kë bi rot la looi tənē ye. ³³ Ku lëk ke, “Emën, ɣok aala Jeruthalem tē bi Manh Raan la dɔm ku ɣëth bäny Itharel nhiiim, ku kɔc piöoc ë lööŋ. Ku abik tēm thou, ku thönkë bënyɲaknhom Roma mac baai bi la nək. ³⁴ Ku abik läät ku buikë, ku

ɲuutkë ku thatkë, ku näkkë, ku na ye nïn kadiäk cök, ka bi pïr ku jət rot raɲ yic.”

Käk wïc Jemith ku Joon
(Mt 20:2-28)

³⁵ Naɣən thëei ke Jemith ku Joon wëët Dhubedï bö tënë Jethu, ku luelkë tënë ye, “Raan piöoc, awicku ba yo luüi kë buk thiëec tënë yï.”

³⁶ Go Jethu ke thiëec, “Yeɲö wiëckë ba looi tënë we?” ³⁷ Gokë dhuk ëlä, “Të nyuc yïn thönydu nhom diεckdu yic nhial, ke yï cəl yo aa nyuc kek yï, raan tök ləɲ cuëc, ku raan dët ləɲ cam.”

³⁸ Go Jethu lək ke, “Wek aa kuc kë thiëckë, ɣen abï baɲ apɛi ë nïnkä ku ɣen abï nök. Lëukë bāk gum cimëndië?”

³⁹ Gokë bëër, “Alëuku.” Go Jethu lək ke, “Na cökkë we nök ayic, ka lëukë bāk gum, ⁴⁰ ku acie ɣen la riel ba raan nyuc köɲdiën cuëc ku köɲdiën cam kuany, ee Nhialic yen abï ke yiëk kacken cï guiër ke.”

⁴¹ Nawën le atuuc kök kathiäär piɲ, ke riääk puəth tënë Jemith ku Joon. ⁴² Go Jethu ke cəl ëbën ku lueel, “Aɲiεckë lən kəc cï gam bik aa bäny kəc cie kəc Itharel aala riel kəc nhïim, ku acïi path bāk ciët ke. ⁴³ Ku kënë acïi rot bi looi kamkun. Raan wïc ye bi ya raandit kamkun adhil rot dhuök piny bi ya luui rin kəc kök. ⁴⁴ Ku na ye raan wïc ye bi ya bëny kəc nhïim, ka dhil ya aluaɲ kəc ëbën. ⁴⁵ Cimën Manh Raan aya akēc bën bi kəc bën loony, acï bën bi kəc bën kony, ku ɣem wëike bi kəc juëc waar thou yic.”

Jethu akony cɔɔr bī daai
(Mt 20:29-34; Lk 18:35-43)

⁴⁶ Go Jethu kek kɔcken ye buɔɔth, ku kɔc juɛc kɔk yet gen Jeriko. Kaam wɛn jiɛl kek geeu, ke mony cɔɔr ɛ kɔc lim, cɔl Timawuth ɛ rɛɛr dhɛl yɔu ke lim.

⁴⁷ Nawɛn piŋ lɔn cī Jethu raan pan Nadharet yɛɛt, ke cɔt rɔl dīt, “Bɛny Jethu yīn aŋääth apɛi. Yīn ɛ wɛn Debit cī Nhialic tooc. Kony ya.”

⁴⁸ Go kɔc kɔk rɛl ku yöökkë bī biɛt, go ɲot kiu apɛi, “Wɛn Debit kony ya.”

⁴⁹ Go Jethu kɔɔc ku lueel, “Cöölkë.” Gokë cɔɔl, “Jɔt rot, yīn aye bɛny cɔɔl.”

⁵⁰ Go rot puur abä alanhden acuat lööny wei yeköu ku riŋ tɛnɛ Jethu.

⁵¹ Go Jethu thiɛc, “Yeŋö wīc ba looi tɛnɛ yī?” Go cɔɔr lueel, “Bänydiɛ, awiɛc ba bɛn daai.”

⁵² Go Jethu lɛk ye, “Lɔɔr, gamdu acī cɔl apuɔl.” Go daai nyin yic, ku buɔɔth Jethu.

11

Jethu acī la Jeruthalem ke ciɛm yai
(Mt 21:1-11; Lk 19:28-40; Jn 12:12-19)

¹ Nawɛn nīn kɔk cök ciɛn, ke Jethu kek kɔcken ye buɔɔth la Jeruthalem. Ku tɛwɛn cī kek thiök kek Bethpeec ku Bethanī, tɛthiääk kek gɔn Olip, ke Jethu tooc kɔcken ye buɔɔth karou tuen, ² ku lɛk ke, “Lak bɛi tɔ tuen yīc ku tɛ yɛet wek, ke wek aabi akaja cīn raan cī kaŋ cath ye yök ke mac. Luɔnykë ku bɛiikë. ³ Na le raan thiɛc we, ke luɛlkë, awic Bänyda, ku abī dhuk ɛmɛn thiin.”

⁴ Gokë la ku yöökkë manh akaja ke mac yöt thok, dhɛl yɔu. Tɛwɛn lony kek ye, ⁵ go kɔc ke kääc tɛthiök

ke thiëec, “Yenö luɔikë, lony wek manh akaja?”
⁶ Gokë læk ke cit tēwën cī Jethu ke than thīn. Go pāl ke ku jiëlkë. ⁷ Gokë manh akaja yāth tēnē Jethu ku kumkë kōu alāthken, ku nyuc Jethu yekōu. ⁸ Kōc juëc aacā alāthken thieth dhël yic, ku kōc kōk aacā ayör tiim dhonj dum yiic, ku thiethkë ke dhël yic aya.

⁹ Go kōc ke tō yenhom tuenj, ku kōc ke buoθh Jethu, yai looi ku yekë wak ëlä,

“Lecku Nhialic! Bēny dōc raan bō ë rienuku,

¹⁰ Nhialic dōc bääny wāda Debit bō! Lecku Nhialic!”

¹¹ Ku jol la Jeruthalem ku bek luanj Nhialic ku ciεeth kēriëc ëbën. Nawën cī piny guo cuol, ke dhuk Bethani kek atuöccke kathiäär ku rou.

Jethu aci tim wak bī riau

(Mt 21:18-19)

¹² Nayon nhiäk, tēwën jiël kek Bethani, Jethu ë nēk cōk. ¹³ Nawën ke tīnj tim cit ŋaap ke cī nhom thiānj ayör, go la cōl bī yök ke cī luok. Nawën le yet ke yök ke ayör kepēc, rin tēden ye yen luok aŋoot.

¹⁴ Go Jethu lueel, “Acin raan kōnj miēthku bēn cam lanayon.” Ku wēt kēnē ëcī kōcken ye buoθh piŋ.

Jethu aci la luanj Nhialic

(Mt 21:12-17; Lk 19:45-48; Jn 2:13-22)

¹⁵ Nawën lek yet Jeruthalem, ke Jethu la luanj Nhialic, ku cop kōc kōnj yaac ayeer kal luanj Nhialic yic. Ku wel agen kōc war wēëu yiic, ku thōc kōc yōc wei ë kuōr.

¹⁶ Ku cī kuat raan la kē muk pāl bī ret luanj Nhialic lööm.

17 Ku jəl kəc piöc, “Acı gət elä athör theer wël Nhialic yic, ‘Luanđië acı looi bī ya tən ye kəc wuät ebën rööc thīn, ku yeen acäk wel bī ya luanđ cuër.’ ”

18 Wēt kënë acı kəc kāk Nhialic ku kəc piöc lööŋ piŋ ku wickë dhël nêk kek ye. Ku keek aake cı riöc Jethu rin cı kəc ebën puöth miët piöcde yic.

19 Nawën la thëi bën, ke Jethu kek atuöccke jiël geeu.

Atuuc Jethu aaci tim wäär tiŋ ke cı riau

(Mt 21:20-22)

20 Nayön nhiäk dëët, tēwën kueny kek dhël yic, ke ke tiŋ tim cit ŋaap wäär cı Jethu wak ke cı riau. 21 Go Pīter kēwäär cı Jethu lueel tak ku lueel, “Raan piöc tiŋ tim wäär ca wak acı riau.”

22 Go Jethu bëer, “Gamkë Nhialic. 23 Wek alëk yic, na le raan yöök gän kënë, cuat rot wīir, ku cı diu ku gem lön bī kē cı lueel rot looi, ka tiŋ rot. 24 Kēya, alëk we, kuat kē thiëc tē rööc yīn, gam lön bī yīn ye yök, ku kē wic aba yök. 25 Ku tē rööc yīn, ke yī pël wēt piny tēnē raan dët, rin bī Nhialic adumuöömku päl piny aya. [26 Na cīi wēt ye päl piny tēnē kəc kök, ke Nhialic acīi awäcdu pël piny.]”

Bäny Itharel aa riel Jethu yööŋ yic

(Mt 21:23-27; Lk 20:1-8)

27 Gokë bën dhuk Jeruthalem, ku tēwën cieth Jethu kal luanđ Nhialic yic, ke bānydīt kāk Nhialic ku kəc piöc ë lööŋ ku jəl aa kəcđit baai, bö tēnē ye. 28 Ku thiëckë elä, “Ee yīn ye riel ŋö tō yīguöp ye yīn luui kēlä? Ku yeŋa yīk yī ë riel kënë ba keek aa looi?”

²⁹ Go Jethu bëër tənë ke, “Wek aba thiëëc wët kënë aya, na bëër kē, ke wek aba lək raan cā yiək riel ye ɣen kakkā looi.” ³⁰ Lëkkē ɣa, “Joon raan kɔc muɔɔc nhïim, yök riel yen kɔc gām lökwëi tənë Nhialic, aye rielde ë rot?”

³¹ Gokë guëëk yic kamken ku luelkë, “Na luelku, ‘Ke yök tənë Nhialic,’ Ka thiëc, ‘Aye nõ këc wek wëtde gam?’ ³² Ku na luelku, ‘Ke rielde ë rot,’ ke ɣok aa jöny keek rin cï raan ëbën ye gam.” ³³ Gokë dhuək Jethu, “Akucku.”

Go Jethu lək ke, “Na ye këya, ke wek aacä lək riel ye ɣen kakkā looi.”

12

Jethu aci jam ë waal bi rëëc bäny nyuɔəth (Mt 21:33-46; Lk 20:9-19)

¹ Nawën ke Jethu jam waal tənë kɔc man ye ëlä, “Monytui ëcï dom looi ku cum yic tiim ë luək ku rək. Ku looi tən ye mïth tim guör thïn bïk ya mäu. Ku wec kät piny. Ku jəl dom riöp yic kɔc kək, ku le kený wun dët. ² Nawën le tē cï tiim luək thööh, ke tooc aluonyde tənë ke bïk la gām abäkke. ³ Gokë alony dom ku thatkë ku copkë ciëen yecin. ⁴ Go raan la dom alony dët ben tooc, gokë yup nhom, ku banjë apei. ⁵ Go alony dët ben tooc, gokë nõk, ku jalkë aloony kək aa that ku näkkë aloony kək. ⁶ Ku ë manhde yen ëcï jal döŋ bi ben tooc. Go jäl tooc ku lueel, ‘Anjic abïk la theek,’ ⁷ Go kɔc awën cï riöp dom yic lueel ë kamken, ‘Kënë ë manh raan la dom, bi këŋ lök thən aköldä. Bäk näkku ku kakkā

aabī dōŋ kek ɣo!’ ⁸ Gokē dām ku nākkē ku cuetkē guäpde wei.”

⁹ Ku jal Jethu ke thiëc, “Yeŋö bī raan la dom looi? Abī bēn ku nēk kəc awēn cī rišp dom yic. Ku riöp dom yic kəc kək. ¹⁰ Kēckē wēt cī gāt athör thēer wēl Nhialic yic kēnē kaŋ kueen?

‘Mēn wäär yen cī atēēt kuec, yen acī bēn a mēn ril apēi.

¹¹ Kēnē ē ye luoi Bēny, ayeku tiŋ ke path ku dhēēŋ yonyin!’ ”

¹² Go bāny Itharel puθh dak ku wickē bīk dām, rin acik ŋic lən jiēm Jethu ē rienken. Ku rin riöc kek kəc juēc tō thīn, gokē puəl ku jiēlkē.

Jethu awic bī wēēŋ wēt ajuēr
(Mt 22:15-22; Lk 20:20-26)

¹³ Go kəc ke man Jethu, Parathi kək, ku kəc Antipāth Ÿerot tuəc tēnē ye bīk la wēēŋ, bī wēt rac lueel. ¹⁴ Ku bīk ku luelkē tēnē ye, “Raan piöc, aŋicku yin ē jam yith. Yin acie diēer kək ye kəc kək tak. Ku yin acie diētden ye kuēc nhom. Ku yin ē kəc piöc bīk kək wic Nhialic looi dhēl la cök. Lək ɣo na ye tāktäku, buk ajuēr dhiel aa gam, ɣok kəc Itharel tēnē Cithēr Bēnyŋaknhom, kua cuk bī gām ye?”

¹⁵ Ku Jethu ēcī ruēnyden ŋic, ku bēer, “Yeŋö wic wek ye bāk ɣa deep ē wēt? Bēikē ē wēnh kēnē ba tiŋ.”

¹⁶ Gokē jal yiēk wēēth. Goke thiëc, “Ye nhom ŋa, ku ye rin ŋa kākā cī giēet wēēth kōu?” Gokē bēer, “Aa kək Cithēr Bēnyŋaknhom.” ¹⁷ Go Jethu

lëk ke, “Gämکہ Cithër Bënyṅaknhom këde, ku gämکہ Nhialic këde.”

Gokë puõth dak rin cï Jethu ruëenyden ṅic.

Nhialic abï kəc cï thou cəl aa ben pïr

(Mt 22:23-33; Lk 20:27-40)

¹⁸ Nawën ke kəc kək akut Thaduthï. Akut cïi ye ye gam lən bï Nhialic kəc cï thou ben cəl apïr, bõ tënë Jethu ku thiëckë ëlä, ¹⁹ “Raan piöoc, Mothith acï lõṅ gõt ëlä tënë ṅo, ‘Na thou wämënh ë raan, ku nyiëṅ tik piny ke cïn mïth, ke wämënh koor ala ṅõt tik bï mïth dhiëeth ṅön mënhe.’ ²⁰ Na thöõṅku lən tõ mïth tik thïn kadhorou. Ku thiëk wën düt ku thou ke cïn mïth. ²¹ Go wën buath ye la ṅõt tik ku thou aya ke cïn mïth cï dhiëeth. Ku loi kënë rot aya tënë mënhe ye kek diäk. ²² Ku looi rot këya tënë wämäthakën kək, keek ëbën kadhorou acïn mïth cïk nyääṅ piny. ²³ Ku lek tuenṅ ku thiëckë, tẽ le kəc cï thou röt ṅot aköldä, bï ya tïṅ ṅa rin cï yen rëer ke ke ëbën kadhorou?”

²⁴ Go Jethu bëer, “Wek aa kəc ril nhïim cïn kë ṅiëckë, rin cïi wek wël cï gõt athör theer wël Nhialic yic ye gam. Ku acäk ye gam aya lən bï Nhialic kë ye lueel ka bï looi, lëu bï looi. ²⁵ Rin tẽ le kəc cï thou röt ṅot, aacï bï thiëek ku aacï bï thiaak, aabï rëer kecït atuuc nhial. ²⁶ Ku na ye rin wët bï kəc cï thou röt ṅot, ke we kęc athör cï Mothith gõt kueen rin bun dëp, tëwäär cï Nhialic jam tënë ye ëlä, ‘Υεν ë Nhialic Abaram, ku Ithäk ku Jakop.’ ²⁷ Kəc cï thou ke ṅic Nhialic aa pïr alanden. Yeen ee Nhialic kəc pïr, ku kəc cï thou aya. Acäk wuöc!”

*Löŋ ril lëu bi theek kam ë lööŋ
(Mt 22:34-40; Lk 10:25-28)*

²⁸ Raan piöoc lööŋ kɔc Itharel ë tɔ thïn tɛwën teer Jethu wël kek Thaduthi. Na le tïŋ ke Jethu ye wëlken ɲiɛc bɛër, go bën tənë ye ku thiëc, “Ye löŋ nen yen ril apeɪ kam lööŋ?”

²⁹ Go Jethu bɛër, löŋ ril akïn, “Piɛŋkë kɔc Itharel, Bányda ë Nhialic ku ee tók. ³⁰ Nhiar Bëny, Nhialicdu puşu ëbën, ku wëiku ëbën, ku nhiamdu ëbën, ku riɛldu ëbën. ³¹ Löŋ dët ril ye kek rou akïn, yïn adhil raan dët nhiaar cimën nhiɛɛr yïn rot. Acïn löŋ dët ril apeɪ wär ë lööŋkä karou.”

³² Go raan piöoc ë lööŋ lueel tənë Jethu, “Ee yic raan piöoc cīt tɛ ca luël ye, acïn Nhialic dët, Nhialic ë tók. ³³ Ku raan adhil Nhialic nhiaar piände ëbën, ku nhiamde ëbën, ku riɛlde ëbën. Ku adhil raan dët nhiaar cimën nhiɛɛr yen rot. Lööŋkä karou kek adhil ë theek, tən tɛ bi Nhialic näk yök ku dor ë yïk nhïim.”

³⁴ Wën tïŋ Jethu ye ke ci bɛër apath, go lëk ye, “Yïn aci mec kek bääny Nhialic.” Ku tɛën acïn raan kam kɔc man Jethu cie bən thiëc.

*Jethu aci kɔc piöoc lɔn yen raan ë tooc Nhialic
(Mt 22:41-46; Lk 20:41-44)*

³⁵ Tɛwën piöoc Jethu luanŋ Nhialic, ke lueel, “Aniɛckë lɔn ye kɔc piöoc ë lööŋ kɔc Itharel ye lueel lɔn Raan ci lɔc ku dɔc, abi ya raan dhiënh Debit?

³⁶ Debit guöp ëci Wëi Nhialic yök bi lueel ëlä, ‘Acı Nhialic lueel tənë Bánydië, “Nyuc ë tən kɔŋdiën cuëc,

yet tē bī yēn kəc atērdū dhuək ciēēn yiēcök.” ’

³⁷ “Ye kēdē ye Raan cī ləc ku dəc manh Debit, ku yeen aye Debit cəəl ‘Bānydiē?’ ”

Jethu alək kəc bīk röt tiit kəc gēt lööŋ Itharel

(Mt 23:1-36; Lk 20:45-47)

Ku kəc juēc awēn cī wēt Jethu piŋ aaci puəth miēt. ³⁸ Tēwēn piöoc yen ke ke lueel, “Tietkē röt, ku duəkkē kəc piöoc lööŋ kəc Itharel ye kiēēt. Kəc cath kek alēthken dīt bār, röt teem yōn yəc yiic bī ke aa muöəth athēk. ³⁹ Ayekē nhiaar bīk nyuc tuēŋ thöc kəcdīt tēn amat, ku yōn path aköl yai, ⁴⁰ ku keek aa kək lēer tuöör nyin, ku röökkē apēi bīk kəc wēŋ lən puəth kek. Kəckä, aabi tēm awuöcdīt tet apēi!”

Ajuēr lēer

(Lk 21:1-4)

⁴¹ Tēwēn cī Jethu nyuc tē ye wēū juaar thīn luan Nhalic, ke döt kəc juēc wēū cuat kēnē ajuēr yic. Ku kəc juēc ajiēk aake cī wēū juēc ya tāū thīn. ⁴² Nawēn ke lēer anāŋ bö ku cuet wēū reen lik thīn. ⁴³ Go Jethu lueel tēnē kəcken ye buəth ēlä, “Wek alək yic, lēer kēnē aci Nhalic kēden cī juaar nhiaar tēnē kəc kək ēbēn. ⁴⁴ Rin keek aa cik juaar wēūken juēc yiic, ku yen anāŋē, aci kēnē bī yen pīr dhuəl thīn ēbēn.”

13

Luan Nhalic Jeruthalem abi thuör piny

(Mt 24:1-2; Lk 21:5-6)

¹ Tēwēn jiēl Jethu luan Nhalic, ke lueel raanden tōŋ ye buəth tēnē ye, “Raan piöoc, tīŋ, ye luan dīt dhēēŋ nō kēnē!”

² Go Jethu bēer, “Yöötdit dhēŋ ye tŋkă, aabi thuör piny ebēn, ka cĭn alēl tōŋ bĭ kōöc alēl dēt nhom.”

*Acĭ Jethu lēk atuöcke lōn bĭ ke maan
(Mt 24:3-14; Lk 21:7-19)*

³ Tēwēn rēer Jethu gōn Olip nhom, ke cĭ yēnhom wēl luanġ ē Nhialic, ke thiēec Pĭter ku Jemith ku Joon ku Andria wēn rēer kek ē rōt. ⁴ “Lēk ȳo, ye nēn bĭ kēnē rot looi? Ku yeŋō bĭ ye nyuōth lōn cĭ tēn bĭ kăkkă rōt looi thiök?”

⁵ Go Jethu lēk ke, “Tiēerkē nhĭim ku duökkē rōt cōl aduōŋ. ⁶ Kōc juēc aabi bēn ē riēnkiē, ku ye ŋek lueel, ‘Ke ȳen Raan cĭ lōc ku dōc,’ ku aabi kōc juēc duōŋ. ⁷ Tē tŋŋ wek tōōŋ ke loi rōt akōldă, bĭ dhiēeth ayĭ kōc wuōn tōk rōt nōk, ke duökkē diēer, kăkkă adhil rōt looi. Ku kăreec kōk aabi rōt looi aya, ku acie lōn cĭ thōk ē piny bēn. ⁸ Rin kōc paan tōk aabi kēnhĭim tuōōm ku thērkē, ku wuōt aabi thōr kamken. Ayiēkyiēek piny juēc aabi rōt looi bēēi juēc yiic. Ku cōŋdit apēi abĭ tōu thĭn. Kăkkă kek aa kăk tūeŋ.”

⁹⁻¹⁰ Ku lēk Jethu atuöcke, “Wēt Nhialic abĭ kaŋ lēk kōc ē pinynhom ebēn, ke thōk ē piny kēc bēn. Muökkē wenhĭim bāk puōth riēl kăreec bĭ we yōk yiic. Wek aabi kōöc bāny nhĭim ē riēnkiē bāk ke lēk Wēt Puōth Yam. ¹¹ Ku tē dōm we ku ȳēth we luk yic, duökkē diēer tē bĭ wek la jiēem thĭn. Lak tūeŋ ke we piōöc wētdiē pinynhom ebēn rin acie wek jam, ee Wēi Nhialic.” ¹² Ku ben Jethu lueel, “Raan kek wāmēnh aabi rōt aa gaany bĭk rōt cōl anāk. Ku wārken mĭth aabi miēthken luōm, ku mĭth aabi kōc ke dhiēth ke luōm bĭ ke cōl aa nāk aya. ¹³ Kōc ebēn

aabī we maan riēnkiē. Ku raan bī ye pušū dēet agut tē bī yen thou, abī pīr akōlriēec ēbēn.”

Kēreec bī rot looi tēnē kōc Jeruthalem
(Mt 24:15-28; Lk 21:20-24)

¹⁴ Piēnkē alēk we aya, “Ala akōl bī wek kērac apei tīŋ. (Raan kuēn adhīl wēt kēnē deet yic.) Na rēēr Judia ku tīŋ ē kēnē, ke yīn adhīl riŋ gat nhūm roor ba la thiaan.

¹⁵⁻¹⁶ “Ku raan tō dom yic aciī ben dhuk baai bā alanhde la lōōm. Ku raan rēēr ayeer, aciī ben la yōt bī la guik kē nyīēi. ¹⁷ Diāār liēc ku diāār muk mīthkor aabī gum apeidit ye nīnkā. ¹⁸ Rōōkkē bī rōt cūi loi wiir yic rut. ¹⁹ Kōc aabī gum apei ye nīnkā, gum kēc kē kaŋ yōk tēwāār cēk Nhialic kōc agut cīt ēmēn. Ku aciī rot bī bēn looi. ²⁰ Na kēc Bēny looi bī nīnkā cōl alik, ŋuōt acīn raan cī pīr. Ku rin kōcken cī kuany, aci nīn cōl alik.

²¹ “Wek alēk kēnē, ‘Na le raan yōōk we tiēnkē Raan cī lōc ku dōc kīn,’ tēdē ke lueel, ‘Tiēnkē yen akan!’ Ke duōkkē gam. ²² Rin kōc juēc abī bēn ku lueel ŋek, ee ŋen Raan cī lōc ku dōc, ku lueel raan dēt ē ŋen raan kāk Nhialic tīŋ, ku looi kārīl apei kōc gōi. Ku mārkkē kōc kōk cī Nhialic kuany, tē lēu kek ye. ²³ Tiētkē rōt, kēriēec ēbēn alēk we ēmēn bāk wenhūm tiit kāk bī bēn!

Akōl bī Manh Raan bēn
(Mt 24:29-31; Lk 21:25-28)

²⁴ “Awiēc ku bāk ŋic aya, ye nīnkā, tē cī kōc jal gum apei, akōl abī kum nyin bī piny cuōl, ku pēei

acii bi ruel. ²⁵ Kuel aabi röt yäak ku löönykë. ²⁶ Ku Manh Raan abi tñ ke bö pial yiic kek diik ku riöldit apëi. ²⁷ Ku yeen abä atuuc nhial tooc bik kacken ci lœc kuööt yiic pinynhom ebën.

²⁸ “Njæckë ë kënë tim cit ñaap, tē looi yen yöök ku looi yith, ke kër aci thiök. ²⁹ Këya, tē tñ wek kakkä ke loi röt, ke njæckë lœn ci yen thiök apëi. ³⁰ Alëk we, wek aacii bi mää rē cœk kakkä röt looi. ³¹ Nhial ku piny aabi liu, ku wëtdië acii bi kañ mää r.

Rëer yi ci rot guiir
(Mt 24:36-44)

³² “Acin raan njic aköl bi kakkä röt looi. Na cœk atuuc nhial, ayi Wënde, ka cik njic, ë Wä rot yen anjic ye. ³³ Rëerkë we ci röt guiir rin wek akuc aköl bi kënë rot looi. ³⁴ Kënë, acit kënë rot looi tënë raan la keny, ku nyiëñ aluœnyke baai, njek ke luœide. Ku lœk raan ci nyiääñ baai thok bi rëer ke tit akölaköl. ³⁵ Këya, wek adhil rëer we tit aya, rin acäk njic yen tē bi Bändun bën thïn, lœn bi yen bën thëei, ku lœn bi yen bën wëer ciel yic, ku lœn yen dhiën thœn ajith, ku lœn yen nhiäknhiäk ë rial. ³⁶ Na guœ bën, ke we cä yök we nin. ³⁷ Kë ya lœk we, alëk kœc ebën. Rëerkë we tit, ke we tir nhïim!”

14

Amat næk Jethu
(Mt 26:1-5; Lk 22:1-2; Jn 11:45-53)

13:24 Ith 13:10; Edhe 32:7; Juel 2:10, 31; 3:15; Ny 6:12 **13:25**
Ith 34:4; Juel 2:10; Ny 6:13 **13:26** Dan 7:13; Ny 1:7 **13:32** Mt
24:36 **13:34** Lk 12:36-38

¹ Nin karou Yan Ayum cïn yic luəu nhom tuen, kəcdit kək Nhialic ku kəc piöc lööŋ aake wïc tē bī kek Jethu dəep thïn, bik dəm ke kuc ku näkkē.

² Ku luelkē, “Acuk dəm aköl yai, ɣok aabi tiit bī kəc juēc kaŋ jäl, rin na dəmku ku näkku, ke kəc ŋoot yai yic, tädē ke kəc juēc aa thär kek ɣo.”

Maria aci tē theek yen Jethu thïn nyuəəth
(Mt 26:6-13; Jn 12:1-8)

³ Ku tēwən rēer Jethu Bethanī pan raan atuet cəl Thaimon, tēwən müth yen, ke tik bö kek tönny koor cī cuēēc ē tiəm ril la yic miök ŋir cəl naar, ye ɣəc wēəu juēc apēi. Ku kuem thok ku luuŋ miök Jethu nhom ēbən. ⁴ Go kəc kək ke rēer thïn puəth dak ku jiemkē kamken. “Yenö tuuk yen miök ŋir? ⁵ Miök ŋir kënë ŋuət aci ɣaac wēəu juēc wär wēəu ye dəm raan ē ruöön tök, ku yik wēəu kəc ŋəŋ.” Ku nyienykē tik apēi.

⁶ Go Jethu lueel, “Pälkē, yenö nyieeny wek ye? Acī kēpath looi tənē ɣa. ⁷ Rin kəc ŋəŋ aabi rēer kek we akölaköl. Ku na wiäckē bāk ke kony ka luəikē. Ku ɣen aci bī rēer kek we akölaköl. ⁸ Tiŋ kënë, aci kē lēu bī looi tənē ɣa looi. Acī bən bā bən təc bī guäpdie guiir bī jal thiök. ⁹ Wek alək yic, kuat tē bī Wēt Puəth Yam piöc thïn pinynhom, kē cī tiŋ kënë looi, abi ya lueel bī ye a tak.”

Judath aci Jethu ɣaac
(Mt 26:14-16; Lk 22:3-6)

¹⁰ Nawən ke Judath, raan tönny atuuc kathiäär ku rou, la tənē kəcdit kək Nhialic bī Jethu la luəm tənē ke. ¹¹ Gokē puəth miət apēi wən piŋ kek wētde, ku

thənkə lən bī kek ye gām wëëu juëc. Ku jəl tē bī yen Jethu dəm thīn wīc.

Jethu acī miēth yai cam kek atuöcke

(Mt 26:17-25; Lk 22:7-14, 21-23; Jn 13:21-30)

¹² Nawën aköl tuen Yandit Ayum cīn yic luəu, nək aməl rin yai, ke Jethu thiëëc kacken ye buəth ëlä, “Ye tēnen wīc yīn yo buk miēth yai la guir thīn?”

¹³ Go Jethu kacken ye buəth tooc karou ku lək ke, “Lak geeu Jeruthalem, ku wek abī rəm kek raan yëëc tööny piū, biaathkë, ¹⁴ pan le yen thīn, ku lëkkë raan la baai. Aye Raan piöoc lueel, ‘Ye yōn nən bī yēn miēth yai cam thīn yok kackiēn ya buəth?’ ¹⁵ Ku abī we nyuəth yōn nhial lääu yic cī guir yic. Guierkë miēthda ë tēēn.”

¹⁶ Go kəc ye buəth jəl ku lek geeu Jeruthalem, ku yökkë kəriëëc ëbən cit tēwën cī Jethu ye lək ke thīn. Ku jəlkë miēth yai guir.

¹⁷ Nawën la thēi bēn, ke Jethu bö kek atuöcke thiäär ku rou. ¹⁸ Tēwën mīth kek, ke lueel Jethu, “Wek alək yic, raan tək kamkun abä luəm ku ë raan mīth kek ya.”

¹⁹ Gokë puəth riäak ku jəlkë gāi ku thiëckë tək-tök, “Makei! Ye yic? Ye yēn?” Ku riëëkkë puəth apēi.

²⁰ Go Jethu bēēr, “Ee raan tək kamkun wathiäär ku rou, raan yecin rek aduök yic kek ya. ²¹ Ee yic, Manh Raan abī nək cit tē cī gāt ye riēnke athör thēer wël Nhialic yiic. Ku raan bī ye luəm abī gum apēi. Ku anuēēn tēnē ye diēt kēc cak dhiëeth.”

Guirku röt apath buk guəp Bēny rəm

(Mt 26:26-30; Lk 22:14-20; 1Kor 11:23-25)

²² Tëwën mïth kek, ke Jethu löm ayup ku dɔɔc, ku bɛny yic ku gëm ke ku lueel, “Lɔmkë kënë, ku camkë, kënë ee guäpdïë.”

²³ Ku lööm aduj cï thiän muön abiëc, ku leec Nhialic ku gëm ke, ku dëkkë thïn ëbën, ²⁴ ku lueel tënë ke, “Kënë ë riemdië, riem ë dör kek Nhialic, bi kuër rin kɔc ëbën. ²⁵ Alëk we, γen aciï bi bɛn dek muön abiëc pinynhom tən kek we, yet aköl bi yok ye dek γodhie pan Nhialic.”

²⁶ Nawën cik jal thök ke ket waak, ku lek gɔn Olip cök.

Jethu aci kë bi Pïter ye jai lueel

(Mt 26:51-35; Lk 22:31-34; Jn 13:36-38)

²⁷ Ku lueel Jethu tënë ke, “Wek kackië, wek aabi kat γa cïmën këwäär cï gät athör thɛɛr wël Nhialic yic ëlä, “γen abä abiöök cɔl anäk ku amël abi wɛɛr.”

²⁸ Ku tē cï γen jɔt ran yic, ke γen abi kan la Galilia ba we la tiit thïn.”

²⁹ Go Pïter lueel tënë ye, “γen aciï bi kat tē cɔk kɔc ëbën kat!”

³⁰ Go Jethu lueel tënë ye, “Alëk yi, ë wëër kënë, ke thɔn ajith këc kiu rou, yïn abä jai arak diäk.”

³¹ Go Pïter dhuök ye, “Na cɔk γa nök kek yi, ke yïn acä bi kan jai.” Ku lueel atuuc kök ëbën këya.

Jethu aröök ke ηic lɔn bi ye nök

(Mt 26:36-46; Lk 22:39-46)

³² Nawën ke Jethu kek kɔcken ye buɔɔth la tē ye cɔl Jethemani, ku lueel tënë ke, “Nyuöckë tən ku yiënkë, γen ala rök.” ³³ Ku cɔl Pïter ku Jemith ku Joon bik la kek ye. Ku jɔl rëer ke nök atiëel,

ku dhiεeu apεi yepuöu. ³⁴ Ku lueel tēnē ke, “Υεν adhiau puöu apεi, ee thou guöp. Rëërkē tēn ku yiēnkē.”

³⁵ Ku le tuenj tēthin-nyööt, ku rëēny rot piny ku röök ëlä, “Na lëu rot, ke kërεεc tit γa acii bö.” ³⁶ Ku lueel, “Wä, yin ë kəriēēc ëbēn lëu, nyaai ë kërεεc kēnē tēnē γa. Ku acie wēt piändië ë wēt piändu.”

³⁷ Nawēn ke dhuk tēnē ke ku yökke ke nin.

Go lueel tēnē Pīter, “Thaimon, niēnkē? Cäk yiēn tēthin-nyööt?” ³⁸ Ku lueel tēnē ke, “Yiēnkē ku röökkē bī we cii them jakrεc. Puöu ë gam ku guöp acin riel.”

³⁹ Ku ben jäl ku le röök cimēn awēn. ⁴⁰ Go ben dhuk tēnē ke, ku ben ke yök ke nin, rin cī nin ke göök apεi. Ku muumkē nhüim kē bīk lëk ye, rin cī kek gup riöc.

⁴¹ Nawēn dhuk tēnē ke kēn ye kek diäk, ke thiēēc ke, “Ntot we nin! Lääŋkē? Njieckē lon cī tēn nin thök, tiēŋkē Manh Raan acī luöm kōc rεc. Ëmēn, tē bī ye jäl thōn kōc rεc acī yēēt. ⁴² Raan cä luöm acī bēn. Jatkē röt, lokku buk rōm.”

Jethu acī dām

(Mt 26:47-56; Lk 22:47-53; Jn 18:3-12)

⁴³ Tēwēn ntot jiem yen, ke Judath raan ye kek thiäär ku rou bö ke cath kek kōc juēc muk paal ku atuel, ke cī kōcdit kāk Nhialic, ku kōc gät lööŋ, ku kōcdit baai tooc. ⁴⁴ Ku Judath ëcī kōc awēn cath kek ye, lëk tē bī kek raan wickē bīk bēn dām njiec thīn, ëlä, “Raan ba muöth ku ciεem yen ë raan wiēckē, damkē ku kuathkē ku tiεtkē röt ë kacke apath.”

⁴⁵ Kaam wēn yēēt Judath, ke la tēnē Jethu nyin yic ku lueel, “Bēny.” Ku muööth ke ciim. ⁴⁶ Gokē

dõm ku derkë. ⁴⁷ Go raan tõk kam kõc ye buõth wën kääc thïn palde miëët bei ku tõk alony lui pan raandit kāk Nhialic yic abī tēem wei ⁴⁸ Go Jethu ke thiëc, “Cāk bēn we muk atuel ku paal bāk ya bēn dõm. Cāk tak lōn ye yen raan kõc rum? ⁴⁹ Yen ē rēer ke we akōlakōl ya piõc luan Nhialic, ku wek aa kēc ya dõm. Ku kēnē aci rot looi ē rin bī kē cī gõt athör thēer wēl Nhialic yiic yenhom tiēn.”

⁵⁰ Ku jōl kōcken ye buõth nyään piny ku ketkë. ⁵¹ Ku riēnythii dēt ceñ alanh acuat ē buõth Jethu. Nawēn wic kōc awēn kuath Jethu bik dõm, ⁵² ke nyiēn alath kecin ku ket kecin kē ceñ.

Jethu aci yāth luan bāny Itharelyic

(Mt 26:5-68; Lk 22:54-55, 63-71; Jn 18:13-14, 19-24)

⁵³ Ku jōlkē Jethu yāth pan Kaipa luk yic, cī bāny kāk Nhialic ku kōc piõc lōn, ku kōc dīt baai kenhīim mat thïn. ⁵⁴ Ku Pīter ē biõth ke mec kōc cōk ciēn agut tē yeet yen luk yic. Ku nyuuc bī yōc aya tēwēn yōc kōc bāny tiit thïn. ⁵⁵ Bāny kāk Nhialic aake cī nyuc bik Jethu wic guöp awuõc cī looi, rin bī kek ye tēm thou, ku acin awuõc cik yōk. ⁵⁶ Kōc juēc aake cī Jethu luõm ē lueth ku wēlken akēc rōm.

⁵⁷ Nawēn ke kōc kōk jōt rōt, ku lueelkē luenh kēnē Jethu guöp. ⁵⁸ Acuk piñ ke lueel, “Yen abī luan Nhialic cī raan looi kēnē thuör piny, ku na ye akōl ye nin diäk, ke yen abī dēt buth nyiēnde, ke cie kēnē ē looi raan.” ⁵⁹ Agut ke aya aa kēc wēlken rōm.

⁶⁰ Go Kaipa rot jōt kenhīim ku thiëc Jethu, “Cin kē dhuk nhom wēl cī lueel yiguöpka yiic?”

⁶¹ Go Jethu biɛt ku cii jam. Go Kaipa ben thiëc, “Ye yök yipuðu ye yin Raan ci lɔc ku dɔc, Manh Nhialic yeku door?”

⁶² Go Jethu bëër, “Ee ɣen, ku wek aabi Manh Raan tɪŋ ke ci nyuc cuëny Nhialic ŋic kãŋ looi ëbën, ku bii ke pial nhial.”

⁶³ Go Kaipa alãthke ret yiic yeköu ku lueel, “Yenö ŋot wicku kɔc kɔk bi ben jam kãk ci looi. ⁶⁴ Wek aci tẽ tɔn yen Nhialic thɪn piŋ. Yenö yen wëtdun?” Gokë mat yic kedhie bi dhiel nök.

⁶⁵ Ku jɔl kɔc kɔk Jethu aa ŋuööt. Ku derkë nyin ku guutkë kecin ku yöökkë, “Μεεk raan yi gut.” Ku dɔm apuruuk ku biëkkë.

Piɛr ajei Jethu

(Mt 26:69-75; Lk 22:56-62; Jn 18:15-18, 25-27)

⁶⁶⁻⁶⁷ Tëwën rëer Piɛr piiny ke ɣɔc mac, ke nyan lui pan Kaipa bö. Ku tëwën tɪŋ yen Piɛr, ke döt apei ku lueel, “Yiin aya, yin yi rëer kek Jethu raan Nadharet.”

⁶⁸ Go jai, ku lueel, “ɣen acii raandun ye lueel ŋic dien. Ku kë ye lueel acã cak deet yic aya.” Ku ler ayeer. Ku kaam thiin awën, ke thɔn ajith kiu.

⁶⁹ Go nyan awën tɪŋ ku ben lëk kɔc kãac thɪn, “Mony kënë ë raanden.” ⁷⁰ Go Piɛr ben jai. Ku kaam awën, ke lueel kɔc ke kãac thɪn tënë Piɛr, “Ee yic, yin ë raanden, rin yin ee raan Galilia.”

⁷¹ Go Piɛr rot kuëëŋ, “Nhialic abã nök tẽ cii ɣen yic luel. ɣen akuc raan jicem wek ë rienke.”

⁷² Nyin yic, tëwën ye dhiën ajith yic rou bëëk piny, ke Piɛr tak këwäär ci Jethu lëk ye, “Tueŋ ke thɔn ajith këc kiu kënë ye kek rou, ke yin abã jai arak

diäk.” Ku wel yenhom wei kɔc yiic ke cī guōp yār ku dhiεu.

15

Kɔc Itharel aaci Jethu gaany tēnē Pilato

(Mt 27:1-2, 11-14; Lk 23:1-5; Jn 18:28-38)

¹ Nayon nhiäk rial yic, ke kɔcdit kāk Nhialic, ku kɔcdit baai ku kɔc piōoc lööŋ mēt tē bik luōi Jethu. Gokē rek ku kuεthkē tēnē bēny Pilato.

²⁻³ Kɔc luk aake cī Jethu gaany lɔn cī yen käreεc apɛi looi. Go Pilato thiëc, “Ye yin bēnyŋaknhom kɔc Itharel?” Go Jethu bēer, “Ee yen, cit tē ca luēl ye.”

⁴ Go Pilato bēn thiëc, “Cii kajuēc cī yī gaanykā ye bēer, piŋ kakkith yeke kuεen yīguōp.”

⁵ Go Jethu biεt ku cii wēt Pilato bēer. Go Pilato gāi.

Jethu aci tēm thou

(Mt 27:15-26; Lk 23:13-25; Jn 18:39–19:16)

⁶ Ruōön ebēn, aköl Yan Ayum cīn yic luou, bēnyŋaknhom ē raan tōk kam kɔc cī mac lony, tē wic kɔc baai ye bi lony. ⁷ Ke mony cɔl Barabath ē mac, kek kɔc cī kɔc nōk ke thār kek kɔc mac baai. ⁸ Go kɔc juēc apɛi la tēnē Pilato, ku thiëckē bi ke luōi kē ye looi aköl yai. ⁹ Go Pilato ke thiëc, “Wiëckē ba Jethu bēnyŋaknhom Itharel, lony tēnē we?” ¹⁰ Ee ŋic lɔn yen tiēl ku män mēen kɔc luk Jethu, yen aabi kek Jethu tēnē ye.

¹¹ Ku kɔc ater Jethu aake ye kɔc kuōöt thook, bik lēk Pilato bi ya Barabath yen lony. ¹² Go Pilato ke thiëc, “Yenō ba looi tēnē raan yakē cɔl ke bēnyŋaknhom kɔc Itharel?”

¹³ Gokē rek yic röldit, “Apiëet tim cī riūu kōu.”

14 Go Pilato ke ben thiëec, “Yenjö? Ye awäc nõ cï looi?” Gokë ben rek yic röldit apeï, “Apiëët tim cï riïu köu.”

15 Go Pilato Barabath lony rin wïc yen kəc bik puõth miët. Ku wën cï yen apuruuk yõök bik that ku ñakkë nhom ë kuõth, ke gëm ke bik la piäät tim cï riïu köu.

*Apuruuk aaci Jethu bui
(Mt 27:27-31; Jn 19:2-3)*

16 Go apuruuk Jethu kuaath ayeer pan bëny. Ku cälkë apuruukken kök bik röt mät ke. 17 Ku rukkë alanh mathiän Jethu köu. Ku jölkë kër la kuõth riic yiic ku ñek kek yenhom. 18 Ku jölkë aa cööl, ku muõthkë ku buikë, “Mädho bënyñaknhom Itharel.” 19 Ku yuupkë nhom wai, ku ñuutkë guõp, ku gutkë kenhial piny bik nyuõth ciët leckë. 20 Wën cï kek ye jal bui, ke ke bëi alanh mathiän awën bei, ku dhukkë aläthke yeköu, ku kuathkë bik la piäät tim cï riïu köu.

*Jethu aci piäät tim cï riïu köu
(Mt 27:32-44; Lk 23:26-43; Jn 19:17-27)*

21 Tëwën cï tim cï riïu Jethu göök kët-kët, ke mony cäl Thaimon, raan pan Thirene, wun Alekdhändër ku Ruputh, ë bö baai ke kuany dhël yic ke la geeu. Go apuruuk döm riël bi tim cï riïu ket. 22 Ku yeetkë të cäl Golgotha, ku wëtde yic, gån la ñuen-ñen cït apen nhom raan. 23 Ku gëmkë Jethu muön abiëc cï liäap wäl kec cäl mir bi dek, go kuc ye. 24 Gokë jäl piäät tim cï riïu köu. Ku cuetkë gæk bik alëth Jethu tek kamken. 25 Ee ye të cït lunyluny yök yen ë piëët kek ye tim cï riïu köu. 26 Ku jölkë awuõc yekë

tak ke cī Jethu looi, gōt nhial tim cī rīiu kōu ēlä, “BENYŃAKNHOM ITHAREL.” ²⁷⁻²⁸ Ku piēētkē cuēr karou kek Jethu tiim cī rīiu kōōth aya, raan tōk lōŋ cuēc ku raan tōk lōŋ cam.*

²⁹ Ku jōl kōc ke ye tēēk tēwēn Jethu aa cuiit ku latkē ku luelkē, “Cie yīn wāār ye lueel lōn bī yīn luanŋ Nhialic thuōr piny ku buth nīn kadiäk. ³⁰ Na ye kēya, yeŋō cīi yīn rot kony ku bār piny tim cī rīiu kōu!”

³¹ Kēya, ee ye kōcken ater bui ku luelkē kamken. “Ee kōc kōk kony ku cīi rot kony. ³² Raan cī lōc ku dōc cī Nhialic nhiaar ku yīk riel, cī rot looi bī ya bānyda, jōl bēn piny tim cī rīiu kōu ēmēn, buk jāl tīŋ ku gamku!” Ku acī kōc awēn cī piāät tiim kōōth cīmēnde aa bui ku lēētkē aya.

Jethu acī thou ayic

(Mt 27:45-56; Lk 23:44-49; Jn 19:28-30)

³³ Nawēn akōl ciel yic ke muōth loi rot yet tääŋ akōl pan awēn, ³⁴ Nawēn tääŋ akōl, ke Jethu cōt rōl dīt, “*Eloi, Eloi, lama thabakthani?*” Ku wētde yic, “Nhialicdiē, Nhialicdiē, yeŋō pēl yīn ɣa wei?”

³⁵ Nawēn piŋ kōc kōk ke kääc thīn, ke luelkē, “Piēŋkē acōl Elija.” ³⁶ Go raan tōk kat ku lut alath muōn wac yic. Ku tēēu wai thok ku ɣōak Jethu thok, ku lueel, “Titku buk tīŋ lōn bī Elija bēn bī bēn bēēi bei tim cī rīiu kōu!”

³⁷ Ku jōl Jethu keŋ apēi, ku thou.

* **15:27-28** Athōr kōk thēer wēl Nhialic aa 15:28 mat thīn ēlä, “Yeen acī nōk cīmēn kōc kārēc looi.” Acī yēnhom tiēŋ. **15:29** Wk 22:7; 109:25; Mk 14:58; Jn 2:19 **15:34** Wk 22:1 **15:36** Wk 69:21

³⁸ Ku kaam wën ka alanh ye gëën, bi luan Nhalic tek yic alon̄thin ræet yic ë rou, jock nhal yeet piny. ³⁹ Go bëny apuruuk tō thin lueel wën t̄n̄ yen tē cī Jethu thou thin, “Mony kënë ë ye Manh Nhalic alanden!”

⁴⁰⁻⁴¹ Diäär aake tō thin, ku keek aake daai tēmec. Wäär rëer Jethu Galilia, ee ye diäärkä buōth b̄ik mieth aa looi tēnē ye. Ku diäär juēc kōk ke cath kek ye, wäär le yen Jeruthalem aake tō thin aya. Kam ë diäärkä Maria Magdalena, ku Thalome, ku Maria man Jemith thii kek Jothepp aake tō thin.

Jethu aci thiök

(Mt 27:57-61; Lk 23:50-56; Jn 19:38-42)

⁴²⁻⁴³ Wën col piny, bi aköl cīi kōc Itharel ye luui guo bën, ke Jothepp raan gen Arimatheo bō. Ku ë ye raan kōcdit lun̄ Itharel, ku yeen aya ëcī Wēt Puōth Yam gam. Nawën le t̄n̄ lōn cī Jethu thou, ke riil yenyin ku ler tēnē Pilato, ku thiëec guōp Jethu bi la thiök. ⁴⁴ Go Pilato gāi lōn nadē ke Jethu cī guo thou. Ku cōl bēny apuruuk ku thiëec lōn cī Jethu guo thou ayic. ⁴⁵ Nawën piñ tēnē bēny apuruuk lōn cī Jethu thou, go guāpde puōl bi Jothepp nyaai. ⁴⁶ Go Jothepp kōc tooc b̄ik alanh yer la yōc, ku b̄ii guōp Jethu piny tim kōu, ku der alanh awën. Ku t̄ëu ran̄ cī wec kuur yic. Ku lōr alal d̄ittet ran̄ thok. ⁴⁷ Maria Magdalena ku Maria man Jothepp aake daai, ku t̄n̄kē tē cī ye thiök thin.

16

Jethu aci rot jōt ran̄ yic

(Mt 28:1-8; Lk 24:1-12; Jn 20:1-10)

¹ Nayɔn thëei aköl cii kɔc Itharel ye luui, ke Maria Magdalena ku Thalome ku Maria man Jemith la miök n̄ir ɣɔc bi kek guöp Jethu la tɔc.

² Nayɔn nhiäk rial, aköl Nhialic, abö aköl nyin ke la ranj nom. ³ Wën n̄oot kek dhël yic, aake röt thiëc, “Yeŋa ba aleldit tō ranj thok la laar wei?”
⁴ Nawën jɔtkë kenyin ke tinj alɛl ke ci laar wei.
⁵ Gokë la ranj yic, ku tinjke riënythii ë kõŋ cuëc ke rëër ke ceŋ alanh yer. Gokë gäi apɛi.

⁶ Go lueel, “Duökkë gëi, anjɛc wek awic Jethu raan gen Nadharet wäär ci piäät tim ci riiu kɔu. Aliu ë tɛn, aci rot jɔt. Tiëŋkë tɛwäär ci kek ye tääu thin. ⁷ Lakkë ku lëkkë kɔcken ye buəth ku Piter, lɔn yen Jethu aci la Galilia. Abäk la yök thin cimën wäär ci yen ye lëk we.”

⁸ Gokë la aɣeer ranj yic ku ketkë, ke leth, ke ci gäi. Acin raan cik lëk wët kënë dhël yic, rin ci kek riöc.[

*Jethu aci rot nyuəth Maria Magdalena
(Mt 28:9-10; Jn 20:11-18)*

⁹ Wën ci Jethu rot jɔt ë ranj yic ɣɔn nhiäk rial aköl Nhialic, ke kõŋ rot nyuəth Maria Magdalena wäär ci yen jakrɛc kadhrou cuɔp wei yeguöp. ¹⁰ Go la ku lëk atuuc Jethu ke rëër thuəu yic ke dhiau, lɔn ci Jethu rot jɔt. ¹¹ Nawën pinjke tɛnɛ ye lɔn ci Jethu bɛn p̄ir, ku aci tinj, gokë cii gam.

*Jethu aci rot nyuəth kɔcken ye buəth karou
(Lk 24:13-35)*

¹² Nawën ke Jethu nyuth rot atuöccke karou ke ci rot waan, tɛwën kuɛny kek baai yic. Ku cik njic lɔn

ye yen Jethu. ¹³ Gokë dhuk Jeruthalem nyin yic bik kacken la lëk, ku akëc kacken gam.

Jethu aci rot nyuəth kacken ye buəth thiäär ku tök

(Mt 28:16-20; Lk 24:36-49; Jn 20:19-23)

¹⁴ Nawën ke Jethu jəl rot nyuəth tənë atuöccke kathiäär ku tök ke ke mïth. Ku nyieeny ke rin këc kek gam, ku rin cï kek nhïim riel bik wët kəc cï ye tïŋ ke cï pïr, cïi gam. ¹⁵ Nayən aköl dët ke lëk ke, “Lak pinynhom ku lëkkë kəc ëbën Wët Puəth Yam Nhialic. ¹⁶ Raan bï gam ku yök lökwëi, abï pïr akölrïëc ëbën, ku raan bï jai aciï bï kony. ¹⁷ Kəc cï gam abï yiëk riel kënë, aabï jakrɛc aa cuəp wei ë rienkië, ku aabï jam thok kək. ¹⁸ Aabï kecin aa tääu kəc tuany nhïim, ku aabï pial. Na cəkkë käpieny kuany, ku dekkë kək ë kəc luaŋ, kacïn kë nək ke thïn.”

Jethu aci yäth pan Nhialic

(Lk 24:50-53; Lk 1:9-11)

¹⁹ Nawën cï Jethu nïn nök ke ke, ke yëth pan Nhialic ku nyuuc köŋ cuëc ë Nhialic. ²⁰ Ku jəl atuuc Jethu thiëi pinynhom ke ke lëk kəc. Ku jəl kəkken jəŋ göi yekë ke looi kenhïim aa tiëŋ, rin tö riel ë Nhialic ke ke.]*

16:15 Luoi 1:8 **16:19** 1:9-11 * **16:20** Athör theer juëc la cök ku kəc theer njc ke Marko 16:9-20 akëc mat thïn.

Lëk yam
New Testament in Dinka, Southwestern (SU:dik:Dinka,
Southwestern)

copyright © 2006 Wycliffe Bible Translators, Inc.

Language: Dinka, Southwestern

Translation by: Wycliffe Bible Translators, Inc.

Dinka, Southwestern

dik

Sudan

Copyright Information

© 2006, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Dinka, Southwestern

© 2006, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

PDF generated using Haiola and XeLaTeX on 11 Nov 2022 from source files dated 29 Jan 2022

d94b9d26-33ff-5c4e-819f-5bfe86ac9e55